

DXUS YUWE SAN MARKOS FXI'JNI

Juan Bautista nasa u'pnimée kiwesu Dxus yuwe's pta'sxni

(Mt 3.1-12; Lk 3.1-9, 15-17; Jn 1.19-28)

¹ Dxus Nçxi'k Jesukristo fxi'zeni's pta'sxnis na'wêk takh:

² Txãniitey Dxus yuwe pta'sxsa Isaiasa' na'jĩnaga fxi'j Dxus we'weni's:

Teeçx adx yuwe pta'sxsa's kajaçthu iidx yaçte, iidx dxi'ja's pheu'khan.

³ Nasa u'pnimée kiwesu sus we'wenik pthũuse' na'jĩna:

Dxus pa'jwa'ja's mpheu'jwe, dxi'ja's ku'le phaadena jĩ'k.

⁴ Txã'wê Isaias we'weni kxtey yuuwa'j ähte', Juana' nasa u'pnimée kiwesu vxyaak nasatx bautisãyna. Sa' na'jĩnak pta'sxi':

—Pkaltxi nvxihtçxa Dxus tasxte misxawedwe, yu'te ya'bautisãyna, kxah i'kwe'sxtxi' Dxusa' pel-tunaĩna.

⁵ Juan we'weni's wēsē'jya' pa'jtx Judea kiwesuwe'sx vxite' Jerusalenuwe'sxwa. Sa' pkalsatha'w jĩna Dxusa's perdon pējxna pa'jsatxi' Juana' Jordan yu'walate bautisai'k.

⁶ Juana' kamelxo khas atxh athçxa kha'txku jxtudu', sa' txajx ũ'nisa yu' khã'sx wala çxhi'dx miltxi yu'.

⁷ Sa' Dxus yuwe's na'jĩnak pta'sxi' nasatx:

—Adx e'suh teeçx yuja' txã' adxte jxthaakwe ãjãwa'jsa'. Adxa' txajx pelgatxi wesçxáa yuhtxwa khihbxa' ãjãwa'jmeesath.

⁸ Adxa' i'kwe'sxtxi' yu' yakhçxáath bautisãyya' ãjã', naapkaçxha' txã' i'kwe'sx ũuste Dxus Espiritu's kxu'akhe'jya' ãjãwa'jsa' jĩ'k.

Jesus ya'bautisãyni

(Mt 3.13-17; Lk 3.21-22)

⁹ Txãn ensu' Jesusa' Nasaret çxhabu kasejk Galilea kiweju. Sa' Juan tasxte pa'the', Jordan yu'walate bautisãyku.

¹⁰ Aça' yu'ju kasejeççxa', uyku cielu phaa-teeçte. Naapkaçxha' Espiritu' tub çxihme na'wësa txajx kajkwekhẽ kĩaçtek uy.

¹¹ Sa' cieluju teeçx na'jĩna we'weniwa pthũusek:

—Idxa' adx Nçxi'k wala wedxnisag. Iidxpaga wala weçxana ũsthu jĩk.

Eçxthẽ'j Jesusa's ĩsxii wëeni

(Mt 4.1-11; Lk 4.1-13)

¹² Txãa dudtey Espiritu' Jesusa's pe'jna u'kh nasa u'pnimée kiwesu.

¹³ Aça' Jesusa' kuarenta enku kxtee u'pu' yu'kh niimal ksxavxyte. Kxtee u'pte', eçxthẽ'ja' pa'kh ewmée vxit wëeçxa. Aça' txãa e'su' Dxus angeleswe'sxwa pa'jtx pu'çxya'.

Galilea kiwesu Jesus mjĩya' takhni

(Mt 4.12-17; Lk 4.14-15)

¹⁴ Juana's karcelte kxuuphni e'su', Jesusa' Galilea kiwen u'kh Dxus jxkaahwa'ja's pta'sxya'.

¹⁵ Sa' na'jĩnak pta'sx:

—Ena' âjâça'. Dxus jxkaahwa'j ena' utxa ũsa'. Aça' i'kwe'sxa' pkaltxi nvxihtçxa Dxus tasxte misxawedwe, sa' Dxus yuwe ewte nvxiitwa'jsa's ũuste myu'akhwe jĩ'k.

Wedx uwesáa pahzsatx Jesus pa'yani
(Mt 4.18-22; Lk 5.1-11)

¹⁶ Txāa e'su' Jesusa' Galilea ĩkh wala pukasu u'jweççxa', uyku pxakhsatx Simon Adreswe'sxtxi. Txāawe'sxa' wedx uwesaatx yu', txāasatx wedx ukhe's ĩkh walate akhna ũsu'.

¹⁷ Aça' Jesusa' pa'yak:

—Adx yakh myuhwe, aça' i'kwe'sxtxi' Dxus jĩi nasaa pkhakhwa'jsa vxitu'nja.

¹⁸ Txā'jĩçpkaçxha', txāawe'sxa' wedx ukhe's nvxihtna' Jesus yakh u'jtx.

¹⁹ Txajũ' Jesusa' ki' u'jçxa', Zebedeo nçxi'kwe'sx pxakhsatxku uy, Jakobo Juanwe'sxtxi. Txāawe'sxa' wedx ukhe's pā'khnatx u'p yu' barkote.

²⁰ Aça' pa'yak. Naapkaçxha' txāawe'sxa' ney Zebedeo's vxite pu'çxsa yakh barkote nvxihtna', Jesus yakh u'jtx.

Eçx iiyamunisa
(Lk 4.31-37)

²¹ Txajũ' Kapernaum çxhabte pa'jçxa', Jesusa' kaapiya'jya' takhku sapatu jxkaase ensu judi-uwe'sx pkhaakhenite.

²² Aça' Jesus kaapiya'jni's wēsē'jçxa', nasa' wala kuh yajxna neeyũutx, txā'wē leya's kaapiya'jsawe'sx na'wēmée, nwēese'jwa'ja's ũukhnus we'wena kaapiya'pha'ga.

²³ Txãa pkhaakheni yatte teeçx piçthêj eçx iiyamunisak ũsu', sa' na'jĩnak sus we'we:

²⁴ —Jesus, Nasarethuwe'sx, kwe'sxtxi' ¿kĩh ya'waga? ¿Ivxiituya' wá'ga yuwé'? Idx kimtewa jiith. Idxa' Dxus kaahnisag jĩte',

²⁵ Jesusa' na'jĩnak ũusçxa we'we txãa eçxa's:

—Sxuuna' myũu, sa' naa piçthêj ũusu mkaaseh jĩna jxkaathe',

²⁶ txãa eçxa' nasa's kaywêçxpa'jna juuna' kweeyi'jçxa kasejk.

²⁷ Txã'wê yũute', nasa' jxukaysa ũukhçxa na'wêtx puutx paapēyi':

—Naa piçthê'ja' ¿kimna? Txajx we'weni' ¿kĩhtxki açki'tx eçx yuhwa nwēesē'je'? jĩ'tx.

²⁸ Jesus txã'wê yũuni's wala dud jiyutx Galilea kiwesuwe'sx jxuka.

Pedro nyu njĩ'ja's Jesus nuykatxhini

(Mt 8.14-15; Lk 4.38-39)

²⁹ Txajũ' judiuwe'sx pkhaakheni yatu kasehçxa', Simon Adreswe'sx yatnak u'j, Jakobo Juan yakh.

³⁰ Aça' kxtee yu' Simon nyu njĩ'ja' kakwesektek açã'na ũsu'. Aça' Jesusa's pta'sxtxi txã'wê açã'sa ũsa' jĩna.

³¹ Txajũ' Jesusa' kũhçxa kuseju pu'kisku, naap-kaçxha' dudtey kakweseka' ũçxhak. Txajũ' kiiteçxa selpiya' kasejk.

Jxuka çxhi'dxiçte maazkuēesatxwa nuykatxhini

(Mt 8.16-17; Lk 4.40-41)

³² Txajũ' çxhi'dxna kîjaçte', jxuka âçã'satx Jesus tasxte nuypa'jtx vxite' eçx luuku vxit-nisatxwa.

³³ Aça' çxhabte nasa' jxuka kũhtx vxitxte thegya'.

³⁴ Txajũ' Jesusa' nuykatxhik fxiyfxiy wee ji'phsatxwa, sa' eçx luuku vxit-satxwa wala kutxi'kh nasaa ũusu. Txãa eçxa' Jesus kimtewa jiitx yu' nawa kwe'we'jme'.

Galileasu Dxus yuwe's Jesus pta'sxni

(Lk 4.42-44)

³⁵ Txã'wẽ yũuni khikhiiçte nee çxhi'dxtey, Jesusa' Dxus yakh puutx we'weya' u'kh çxhab ekaju.

³⁶ Aça' Simona' vxite yakh Jesusna pakweya' u'kh.

³⁷ Sa' uyçxa' pta'sxku:

—Jxukaysa idxa's jxpeejxta' jîtewa,

³⁸ Jesus pasçxa':

—Ay utxasuwe'sx vxitewa peejxta' Dxus yuwe ewsa's, aça' kxsũ u'jwega. Txã'wẽ pta'sxna pekũjxa' iïçxáath naa kiwete kîh jîk.

³⁹ Sa' eçx iiyamuçxa luuku vxit-satx nasaa ũusu kutxi'jna Galilea kiwesu jxuka pekũjk Dxus yuwe's pta'sxna, vxite' judiuwe'sx pkhaakhenisuwa.

Teeçx piçthẽ'j wã'jy weete âçã'sa's Jesus nuykatxhini

(Mt 8.1-4; Lk 5.12-16)

⁴⁰ Txãn ensu' teeçx piçthẽ'j wã'jy wee seena' kazxsate âçã'sa Jesus tasxte peejxũkweçxa na'jîk:

—Adxa's nuykatxhiwá'ga ahçemeeçxa' jïna pxthaa we'wete',

⁴¹ Jesusa' peeygãhna kuseju jxa'dxçxa':

—Ahçeme'nja, naa pa'ga katxhiçxa mneeyũu jïçpkaçxa',

⁴² txãa wã'jy weeju katxhiçxak neeyũu.

⁴³ Txajũ' Jesusa' txãa piçthẽ'ja's wala neewe'weçxa kaakh na'jïna:

⁴⁴ —Adx we'wenitxi' jxpa'yakçxa, maa yuhtxwa pta'sxmeene'ga, naasáa sacerdotexá's iidx kakwe's txwesya' me'j. Sa' txãa weeju katxhipa'ga Dxusna peesune'ga Moises ma'wẽga jxkaah txã'wẽy, kxah nasa jxukaysa jiyutxna idx ew katxhiçxa neeyũutewa jïnak neewe'we.

⁴⁵ Nawa txãa piçthẽ'ja' nasa jxukaysatx pta'sxku, Jesus ma'wẽ yũuni'swa jxuka. Txãa pa'gaçxáa Jesusa' maa çxhabte yuhwa äate pa'jya' äjãmeeçxa', çxhab ekaju nasa meesuçxáak u'ju'. Makwe txã'wẽ yũutewa, txajx tasxte yu' majũwe'sxwa pa'jna nestxi yu'.

2

Esẽya' äjasame's Jesu nuykatxhini

(Mt 9.1-8; Lk 5.17-26)

¹ Maz en skhẽwniijũ' Jesusa' ki'kin pa'kh Kapernaum çxhabte. Aça' nasa jiyutx Jesusa' pa'jçxa teeçx yatte ũsa' jïni's.

² Txãasatx naa dudte nasa wala pkhaakheçxa yat vxitxte jxuka uta, aça' Jesusa' Dxus yuwe's pta'sxku.

³ Naapkaçxa' pahz piçthẽ'jsa teeçx esẽya' äjãsameea's yakhçxatx Jesus tasxte nuypa'j.

4 Nawa nasaa ksxavxyte Jesus tasxte kutxa'jya' âjãmeeçxa', yat kajkweju phaadeçxatx Jesus ũsnikhẽ nuykĩh aadasga khikhçxa.

5 Txajũ' âçã'sa's nuypa'jsawe'sxa' Jesusa' nuykatxhiyujuna sũhni's jiyuçxa', txãa âçã'sa's we'wek Jesusa':

—Iidx pkala' peltunãyni yã'jtx neeyũu jĩte',

6 Dxus leya's kaapiya'jsawe'sx wẽsẽ'jna u'psa maai' yu' na'wẽtx yajkx:

7 —¿Ma'wẽçxaga naa piçthẽ'ja' txã'wẽ we'we'? Dxus yuuçxáa pkaltxi peltunãyya' âjawa'jsa', aça' jweeju yu' ¿kimçxá' peltunãyya' âjãma'k'? Aça' Dxusa's iiweeçx we'wena ũsa' sũjũ'tx.

8 Nawa Jesusa' txãawe'sx yaakxni's jiyuçxa na'jĩk:

—¿Kĩh yuutekwe txã'wẽ yaaki'?

9 ¿Maa thẽyeesakx? Iidx pkala' peltunãyni yã'jtx neeyũu ¿jĩniá'? Meeçxa': Kiiteçxa iidx deeni's tu'sçxa me'j ¿jĩniá'?

10 Makwe thẽysatewa Dxus Nçxi'k Nasa Yuusa' naa kiwete pkaltxi peltunãyya' âjawa'jsa' naa pa'ga kaajiyu'jya'wath âçxha'. Txajũ' âçã'sa's na'jĩk:

11 Idxa'sthu we'we': Kiiteçxa iidx deeni's tu'sçxa yatna me'j jĩçpkaçxha',

12 âçã'sa' dudtey kiitena'wa txajx deeni's tu'sçxa u'kh, nasa thegna ũsiyna.

Txajũ' jxukaysa wala kuh yajkxna Dxusna weçxana na'jĩ'tx:

—Bagaçx yuhwa na'wẽ yũuni yu's iiuymeetha'w jĩ'tx.

Mateo's Jesus pa'yani
(Mt 9.9-13; Lk 5.27-32)

¹³ Txãa e'su' Jesusa' ki' u'kh ìkh wala pukan. Aça' txajx tasxte nasa wala pkhaakhete', Dxus yuwe's kaapiya'kh.

¹⁴ Txãajũ ki' u'jçxa', Alfxeo nçxi'k Levxia'sku uy, gobierno jïi vxyu pkhakhna u'pte. Sa':

—Adx yakh myuh jïna pa'yaçpkaçxha', Levxia' kiitena' Jesus yakh u'kh.

¹⁵ Txajũ' Jesusa' txãa yakh u'jusawe'sx yakh Levxi yatte ù'ya' u'kate', gobierno jïi vxyu pkhaksawe'sx vxite' pkalsawe'sxwa wala kuhsa pkhaakheçxa' Jesus yakh mesate ù'ya' kaçxtxi.

¹⁶ Aça' Dxus leya's kaapiya'jsawe'sx vxite' fxariseowe'sxa' Jesusa' nasa txã'wësa ksxavxyte u'pte uyçxa', pëjxtxi Jesus yakh u'jusawe'sxtxi:

—I'kwe'sxtxi kaapiya'jsa ¿ma'wëçxaga gobierno jïi vxyu pkhaksawe'sx vxite' pkalsawe'sx yakh ù'wé'? jïte',

¹⁷ txã'wë pëyiçte Jesus wësë'jçxa' na'jïk:

—Yu'çe'jsa's jxpeejxmeeta' aka ji'phmée wët ùssa', naasáa açã'sa yuuçxáa yu'çe'jsa's jxpeejxta'. Adxa' naa kiwete nasa ewsatx pakweya' kïhmeeth, pkalsatx pakweya'çxáath kïh jïk.

Yūunani's Jesusa's pēyni
(Mt 9.14-17; Lk 5.33-39)

¹⁸ Teeçx ente', Juan yakh u'jusa vxite' fxariseowe'sx yakh u'jusa txã'wë yūunaana ũste', nasa paapëjxtxi Jesusa's:

—¿Juan yakh u'jusa vxite' fxariseowe'sx yakh u'jusawe'sxa' yūuna'tx, aça' idx yakh u'jusawe'sx yu' ¿kïh yuuçxata yūuna'çmée? jïte',

19 Jesusa' na'wêk kaaja'da'jna pas:

—¿Novxiowe'sx kaba ente pi'kxnisa' yūunaaya' ājāma'tx? novxio txāawe'sx yakh nee ūsiite'. Kabani fxiesta pçumeyte', yūunaaya' ājāmeetxna.

20 Nawa novxio' txāawe'sx tasxu txuteewa'j en pa'jana, txājū isa yūunaatxna.

21 Ropa ĩisx suteniite, tela u'sesa yakh ya'pā'khe'çme'. Txā'wēme', tela u'sesa' jweeíçxáak sude' ĩisxsa's.

22 Txā'wēy beka u'se aahnisa's slun ĩisxsate ya'awu'çme'. Txā'wēme', beka u'sesa' slun ĩisxsa's sude'k, aç'a beka yakh slun yakh e'zii vxitu'tx. Txāa pa'ga beka u'sesa's slun u'sesate awwa'ja' jĭk.

*Jxkaase entewa skuutxhtxi çxuktedeçxa ũ'ni
(Mt 12.1-8; Lk 6.1-5)*

23 Teeçx sapatu jxkaase ente', Jesusa' skuutxh ehsuk skhēw. Aç'a txāa yakh u'jusawe'sxa' skuutxhtxi çxuktedeçxa ũ'tx.

24 Aç'a fxariseowe'sxa' na'wētx pējx:

—¿Uyu'gá' idx yakh u'jusawe'sxa' ma'wēçxata mjii en meetewa txā'wē yū'? jĭte',

25 Jesusa' na'wêk pas:

—I'kwe'sxa' Dxus librute iilēeymeewá'kwe Davxida' çkĭhga yuu? txāa yakh pi'kxna u'jusawe'sx yakh teeçx ente' wēeçxa'.

26 Sacerdote npiçthē'j Abiatar ente' dxuus yatte u'kaçxa, kxtee pantxi ũ'k, sa' txāa yakh u'jusatxwa ũsu'sku. Txāa pana' naasáa sacerdotewe'sxçxáa ũ'wa'the jiiçxawa txā'wêk yūu.

27 I'kwe'sxa' mjiyuwe: Jxkaase ena' nasatx selpiwa'jsa i'çxá', nawa suwwa'jsa yu' me'.

28 Txãa pa'ga Dxus Nçxi'k Nasa Yuusa' jxkaahwa'j ji'pha' makwe sapatu jxkaase entewa jĩk.

3

Teeçx piçthě'j txajx kuse udxnisa (Mt 12.9-14; Lk 6.6-11)

1 Vxite sapatu ente' Jesusa' ki'kin judiuwe'sx pkhaakheni yatte u'kak. Aça' kxte' teeçx piçthě'j teeçx kuse udxnisa kěese'jya' ājāsameek u'p yu'.

2 Aça' fxariseowe'sxa' Jesusa's peethegu'natx ũsu', sapatu jxkaase ente nuykatxhite' pãatxhĩ'khya' sũhçxa.

3 Txajũ' Jesusa' txãa piçthě'ja's pa'yaçxa nasaa pxãhte kxuuju'jçxa',

4 na'wěk paapějx vxite kxtee ũsatsx:

—Sapatu jxkaase entewa pu'çxte ¿ewmanx? meeçxa' ¿pu'çxwa'jmeemanx? Nasa's nwe'wete ¿ewmanx? meeçxa' nwe'wemeete ¿ewmanx? jĩte', txãawe'sxa' pasmée sxuuna'tx neeyũ.

5 Txã'wě fxariseowe'sxa' Jesus we'weni's jxpa'gaya' wa'lte', Jesusa' txãawe'sxtxi ũusçxa thegçxa na'jĩnak we'we txãa piçthě'j kuse udxnisa's:

—Kuse's mku'le'j jĩçpkaçxha', txajx kuse' ewuuk.

6 Txajũ' fxariseowe'sxa' Jesusa's ikhya' puutx we'weya' u'jtx Herodes ju'gsawe'sx yakh.

Nasa wala kuh pehnatx ìkh pukasu

7 Naapkaçxa' Jesusa' txãa yakh u'jusawe'sx yakh u'kh ìkh wala pukan. Aça' Galileaju nasa wala kuh u'jtx Jesus e'stey.

8 Txã'wē Jesus kījkihwa ew yūuni's nasa jiyuçxa', majūwe'sxwa Jesus tasxte pa'jtx thegya', Judeajuwe'sx, Jerusalenuwe'sx, Idumeajuwe'sx, Jordan yu'wala kutejuwe'sx, vxite' Tiro, Sidon çxhab peeku'juwe'sxwa.

9-10 Nasa txã'wē wala pa'the', maazkuēe açã'satxwa nuykatxhik, aça' jxukaysa Jesusa's kpaajxa'dxçxa katxhi wēesa txajx tasxteçxaçxáa utxaaçxa akaaçxpçxãhtx yuuna ũsu'. Txãa pa'gak Jesusa' txãa yakh u'jusawe'sxtxi jxkaah teeçx barko ih ji'phukahñ akaaçxhiçte kxtee khēewa'j.

11 Aça' eçx iiyamunisawe'sxa' Jesusa's uyçxa, txajx tasxte peejūkwna na'jīnatx we'we':

—Idxa' Dxus Nçxi'kgu jīte',

12 Jesusa' txãawe'sxtxi' wala juuna' we'wek kintewa āate kaajiyu'khamen.

Doce nasa Jesus txhitxhni

(Mt 10.1-4; Lk 6.12-16)

13 Txãa e'su' Jesusa' thã'the u'kh kuh nasatx pi'kxçxa.

14 Aça' kxtee kãhçxa', doce nasatx txhitxhku txãa yakh u'juwa'jsa, txãawe'sxtxi' Dxus yuwe's pta'sxya' kaajxa'.

15 Txã'wē txhitxhçxa', açã'satxwa nuykatxhina eçx luuku vxit-satxwa ũusu kutxi'jya' ājãwa'ja's ũsku.

16 Txãa doce nasa' na'wē yaaseta': Simon, txã'sa' Pedro yasek ki'p.

17 Vxite' Zebedeo nçxi'kwe'sx pxakhsa Jakobo Juanwe'sxtxi yu'. Txãa pxakhtxi' Boanerges jīnatx kxsuus', nasa juuna'sa pa'ga.

18 Vxite' Andrés, Fxelipe, Bartolomé, Mateo, Tomás, Alfxeo nçxi'k Jakobo, Tadeo, vxite' Simón kananista nasa,

19 vxite' Judas Iskariote, Jesusa's açesawe'sx kusete dukhwa'jsa.

Jesusa' thã'ju sxawedçxa', teeçx yattek u'ka, txajx txhitxhnisawe'sx yakh.

Dxus Espiritu's açewe'weni
(Mt 12.22-32; Lk 11.14-23; 12.10)

20 Txã'wëy nasa iiméh wala kuh pkhaakhete', ù'wa'j en yuhwa ji'phumeeta'.

21 Txajū' Jesus nwe'sxa' txã'wë yūuni's jiyuçxa', Jesusa' luuku yuune' sūhçxa pe'jna u'jya' pa'jtx.

22 Aça' Dxus leya's kaapiya'jsawe'sxwa Jerusalenu pa'jçxa' na'jī'tx:

—Naa piçthē'ja' eçxthē'ja's yuu ūuste ji'pha'. Txã'wëçxaíik eçxtxi nasaa ūusuh kutxi'jya' ājā' jīte',

23 Jesusa' nasatx pa'yaçxa na'wëk pta'sx jiyukahñ:

—¿Ma'wëçxa eçxthē'ja' eçxthē'ja's íiçxáa kutxi'jya' ājā'kx?

24 Maa kiwetewa gobierno' peekx nasatx íiçxáa ahçeçxa puiiçxa', çxhãçxhameena.

25 Txã'wëy teeçx yattewe'sxwa puutx yahçena puiiçxa', pçuutxna puutx uuna.

26 Aça' txã'wēy eçxthē'jwa txajx jxkaahnisa eçx yakh iıçxáa puıçxa', çxhãçxhamée puutx pçuutxna.

27 Kim yuhwa ewteçxah yu' nkuusa'jya' äjãmeetxna, yat namu khuē'ya's tudmeeçxa yu'. Aça' txã'wē tudçxa yuuçxáa nkuusa'jya' äjãtxna.

28 I'kwe'sxa' mpa'yajkxwe: Nasa naa kiwete kîhwa ewmée yūuni kîhwa Dxusna ewmée nuywe'wetewa txãatxi' jxuka ya'peltunaïna.

29 Nawa Dxus Espiritu's açewe'wete', bagaçxte yuhwa peltunäynimée yuuna, uu kiwen kaahwa'jçxáa nvxiituna jîk.

30 Nasa we'weçxa': Eçxthē'ja's ũuste jî'pha' jîpa'gak txã'wē pta'sx Jesusa'.

*Jesus njî'j vxite' txajx nyakhwe'sx
(Mt 12.46-50; Lk 8.19-21)*

31 Naapkaçxha' pa'jtx Jesus njî'j vxite' nyakhwe'sx jxuka. Sa' ekate kûhçxa, Jesusa's pa'yakaahtx.

32 Aça' Jesus yakh dxiite u'psa' pta'sxtxi na'jîna:
—Iidx mama iidx nyakhwe'sx pa'jçxa ekate ũsta', sa' idxa'stxi yuukaja' jîte',

33 Jesusa' na'wēk pas:
—¿Kimtxikwe adx mama adx nyakhwe'sx jîna we'wé'?

34 Sa' txã'wē pta'sxsatx thegçxa' na'jîk:
—Adx mama adx nyakhwe'sxa' naata'.

35 Dxus jxkaahni's nwēese'jna kxtey yuusáa yuuçxáa, adx nyakh, adx npe'sx, adx mama na'wēsata' jîk.

4

Skuutxh uuhsa's kaaja'da'jni
(Mt 13.1-9; Lk 8.4-8)

¹ Jesusa' ki'kin ìkh wala pukate kaapiya'jya' kasehte', nasa iiméh wala kuh pkhaakheçxa utaaçte', Jesusa' barkote khêeçxak pta'sx. Aça' nasa yu' ìkh wala pukate neeyũutx wêsê'jna.

² Txajũ' kījkihwa pta'sxku ejemplo yakh kaaja'da'jna. Sa' na'wêk kaapiya'j:

³ —Mwêesê'jwe: Skuutxh uuhsa' ujxa' kasejk.

⁴ Aça' mteeí yu' dxi'jsu áasu neeyũute', vxiçxakwe ũ'tx.

⁵ Vxite ahsu' kwet kajkwesutx neeyũu kiwe peççxáa ji'phsu. Sa' kiwe jwetmêe ya'fxihbçxa' dudtxi buçxa.

⁶ Nawa sek açxaate' jxuka uhdxku, weçe dxiimeene' ji'phu' naa pa'ga.

⁷ Vxite ahsu' çhũçh ksxavxysutx ũsxi, aça' çhũçh walaaçxa jxuka aphte', çutmeeta'.

⁸ Vxite ahsu' kiwe ewsatek ũsxi, sa' buçxaçxa wala ew çuttxi. Maa tasxíi yu' treinta, vxite' sesenta, vxite' cien nxinxtxi çut.

⁹ Na'wê pta'sxthu txã'sa' jiyuwa'jsa ũsçxa', jiyune'kwe jík.

¹⁰ Txajũ' nasa kuhsa yu' u'the, Jesusçxáak neeyũu, doce txhitxhnisawe'sx vxite nasa yakh. Aça' txáawe'sxa' paapējtxtxi txāa ejemplo's ma'jñitewa jiyuya'.

¹¹ Aça' Jesusa' pta'sxku:

—Dxus jxkaahni ensu ma'wě yũuwa'ja'swa kim yuhwa jiyunimeesa's i'kwe'sx yuutxi's kaajiyu'jwa'ja'. Nawa jiyuwa'jmeesatxi's ejemplo yakhçxáa pta'sxwa'ja',

¹² kxah uyçxawa, uysamée na'wěçxáa neeyũutxna, sa' wěsē'jçxawa, wěsē'jsamée na'wěçxáa neeyũuçxa Dxus tasxte sxawedmeetxna, aç'a' txãawe'sxtxi' Dxusa' peltunaĩmeena.

¹³ Txajũ' na'wěk ãate kaajiyu'j:

—I'kwe'sxa' naa ejemplo's jiyu'çmeewá'kwe. Txã'wěçxa' ¿ma'wě vxite ejemplotxwa jiyuki'kwe?

¹⁴ Skuutxh uuhsa' Dxus yuwe's pta'sxsa na'wěsa'.

¹⁵ Maa nasaí yu' skuutxh fxiw dxi'jsu ũsxisáa na'wěsata': Dxus yuwe's wěsē'jçxa ũuste jxpa'gatewa, eçxthē'j pa'jçxa txãa yuwe's ũusu kutxi'jina.

¹⁶ Vxite nasa' skuutxh fxiw kwet kajkwesu ũsxisáa na'wěsata': Dxus yuwe's açxhíi yu' weçxanatx jxpa'ga'.

¹⁷ Nawa ũusuh jxuka yajkxçxa jxpa'gameeçxa', Dxus yuwe's ahçeçxa pkxuwa'j en pa'theçxáa txaçxmeyna wete'tx.

¹⁸ Aç'a' vxite nasa' skuutxh fxiw çhũçh ksx-avxysu ũsxisáa na'wěsata': txãawe'sxa' Dxus yuwe's wěsē'thewa,

¹⁹ naa kiwete kĭjkĭhwa ji'phu wēenisaçxáa ũuste jxuka khēeçxa Dxus yuwe yu'sa' kaapeçxkana'juna.

²⁰ Nawa maa nasaí yu' skuutxh fxiw kiwe ewsate ũsxiçxa ma'wěta maaí yu' treinta, vxite'

sesenta vxite' cien nxinx pehna, txã'wẽ Dxus yuwe ãuste penawa'jsa'.

Ãate jiyuwa'j yu' neeyũuwa'jsamée
(Lk 8.16-18)

²¹ Txajũ' vxite ejemplo na'wẽk pta'sx:

—Lampara's pki'taçxa ¿kaja dxiite meeçxa' atũu dxiite sũthnisatxná'? Txã'wẽ yũumée, lampara's áatek ya'txaja', eena' kweethkahn.

²² Makwe sũttewa, uynimée yu' kĩh yuhwa neeyũumeena. Sa' txã'wẽy makwe ãusteçxáa yaakxnisa'swa jiyunimée yu' neeyũumeena.

²³ Jiyuwa'jsa ũsçxa', jxpa'yakx mwẽesẽ'jwe jĩçxa',

²⁴ na'wẽk pta'sx:

—Adx kaapiya'jni's jxpa'yakx mwẽesẽ'jwe. I'kwe'sx wa'lmée wẽsẽ'the', Dxusa' jxthaakwe kaajiyu'juna.

²⁵ Dxus yuwe's jiyuwa'jsa's kaajiyu'jni yu-una. Nawa Dxus yuwe's jiyuwa'jmeesa's kaajiyu'jnimée yuuna jĩk.

Dxus naa kiwete jxkaajxa' pa'jnisa

²⁶ Jesusa' vxite ejemplo pta'sxku:

—Dxus naa kiwete jxkaajxa' pa'jnisa' na'wẽsa': Teeçx piçthẽ'j mjĩisa' fxiwa's kiwete uhçxaçxáa

²⁷ u'jwe'k sa' txaçxku thegya' pa'jaçmée. Aça' uuhnisa' buçxaçxa wala'k, nawa uuhsa yu' jimeek yu' ma'wẽ buçxana walaaçtewa.

²⁸ Fxiwa' kiwete ujaxã'the', peekxçxáa buçxa'k kĩhwa yuumeetewa, nyafxte' tasx khuẽ'y wala'k, txã'wẽ yuuçxak spiiga kaseje', txãa e'su'k nxinx kaseje',

29 aça' thē'j ente', pkhakhya' kaseje'tx.

Mostasa fxiwa's kaaja'da'jnisa
(Mt 13.31-32; Lk 13.18-19)

30 Vxite ejemplok pta'sx Jesusa':

—Dxus naa kiwete jxkaajxa' takhnisa's ħkīh yakh kaaja'da'ja'kxtha'w aç jiyuki'kwe?

31 Mostasa fxiw na'wēsa' aça' txāa yakh kaaja'da'ja'nja'w.

Txāa fxiwa' maa maa fxiwtewa thaakwe musekuēta',

32 nawa kiwete ujsxā'the', maa ējsxā tasxtewa jxthaakwek walāa, seena' wala çxhā'px kasehna. Aça' vxiçxakwe yuhwa txāa ējsxā ksxavxysu yaat-ya' ājā'tx. Naa kiwete Dxus jxkaajxa' takhnisa' txā'wēysa'.

Ejemplo yakh kaapiya'jwa'ja's pta'sxni
(Mt 13.34-35)

33 Jesusa' Dxus yuwe's txā'wēk pta'sxi' wala kuh ejemplo kutxi'jna, jiyuwa'jsa' jiyuya' ājākahn.

34 Ejemplo ji'phmēe yu' kaapiya'ja'çme'. Nawa txāa yakh u'jusawe'sx yuutxi's kīh ejemplo'swa jxuka khiyu'jçxak nvxiitu'.

Marte wejxa wala's Jesus kxuujj'ni
(Mt 8.23-27; Lk 8.22-25)

35 Txāa entey çxhi'dxna kījaçte', Jesusa' na'jīk txāa yakh u'jusawe'sxtxi':

—U'jwega īkh wala kuten jīte',

36 nasatx nvxihtna' Jesusa's pe'jna u'jtx txāawe'sx khēeçxa u'pni barkote. Aça' vxite barkowa ihtey u'jtx.

37 Ìkh wala pxājũy u'jweçpkaçxha', wejxaa wala kiiteçxa barko's ìkh dxiikhẽ akhya'wak yu', yu'a's barkote yuutaçxa.

38 Naapkaçxha' Jesusa' deenik yu', barko e'ste kaçxçxa dxikthe's peedxikiga khikhçxa. Aça' txãa yakh u'jusawe'sxa' Jesusa's fxĩtxtxi na'jĩna:

—Ìkh dxiikhẽ khẽjeçtha'w aça' ¿kwe'sxtxi' peeygãja'çmeega'? jĩte',

39 Jesusa' kiiteçxa, wejxa's we'wek yujukahn petx ìkh yã'jçxa. Naapkaçxha' wejxa yujute', ìkhwa yujuk.

40 Txajũ' Jesusa' txãa yakh u'jusawe'sxtxi' na'jĩk: ¿Kĩh yuuçxakwe Dxus yu's yajkxmée txakwe wala ùukhú'? jĩk.

41 Txã'wẽ wejxa yuhwa nwẽese'the', txãawe'sxa' wala kuh yajkxna neeyũutx na'jĩna:

—Naa piçthẽ'ja' ¿kim yujkx, açki'tx wejxa ìkh txã'wẽsa yuhwa nwẽesẽ'jé'? jĩ'tx.

5

Gadara kiwetewe'sx eçx iiyamunisa

(Mt 8.28-34; Lk 8.26-39)

1 Txajũ' ìkh wala kute Gadara kiwete pa'jtx.

2 Aça' Jesus barkoju kasejeçpkaçxha', teeçx piçthẽ'j eçx iiyamunisa uusáa pedani kafxu kasehçxa Jesus tasxte utxaak.

3 Txãa piçthẽ'ja' uusáa pedani kafxsuk u'psa yu', aça' txã'sa' kim yuhwa çam kadenaju tudçxa jxpe'jya' ãjã'çmeeta'.

4 Çxida petx kuse yã'jçxa maazkuëe uswa tudtewa, nuywejíméek çxuktedeçxa pũsxi'. Aça' kim yuhwa ãjã'çmeeta' tudçxa jxpe'jya' yu'.

⁵ En ma'k yuu kus ma'k yuu nawa vxiçsu vxite' uusáa pedani kafxsu weynak pekũjũ' kwet-su kpã'yuuna.

⁶ Nawa Jesusa's jxu'the uyçxa', wuwuuna u'jçxa txajx tasxte peejxũkwek

⁷ sus we'wena:

—¿Adxa's kĩh yũuya'waga? Jesus, Dxus ãtxĩsa Nçxi'k. Dxus pa'ga adxa's peeygãhçxa txakwe seena' wala nxuste yu' kaahnu jĩk.

⁸ Jesusa' eçx luuku vxit-sa's we'weçxa': Naa piçthẽ'j ũusu mkaaseh jĩpa'gak txã'jĩ'.

⁹ Txajũ' Jesusa' pẽjxku:

—¿Kĩh yaasega? jĩte', pta'sxku:

—Legion yaaseth, wala kuhtha'w naa pa'ga jĩk.

¹⁰ Sa' txãa eçx luuku vxit-sa' wala pxthaa we'wek txãa kiwejũ kutxi'khamen.

¹¹ Txajũ' kxsũ vxiç ja'dasũ wala kuçxi ũsu'tx aphna.

¹² Aça' eçx luuku vxit-sa' na'jĩnatx pxthaa we'we:

—Kuçxi ũuste khẽeya' u'khan kwe'sxtxi mkaah jĩte',

¹³ Jesusa' txãa eçx luuku vxit-satx kuçxi ũuste u'kaya' kaakh.

Txajũ' txãa eçx luuku vxit-sa kuçxi ũuste khẽete', kuçxi' luuku yuuçxa penxakhẽ peluçxa yu'teçxaçxáa khẽeçxa jxuka uutx. Txãa kuçxi' dos mil ãhtx yu';

¹⁴ Txã'wẽ yũute', kuçxi thegsa ũukhçxa wala dud pta'sxya' u'jtx çxhabsu vxite' çxhab ekaju jxuka. Aça' nasa' wala pa'jtx thegya', kĩh yũutewa uyya'.

15 Sa' Jesus ũsnite pa'jçxa uytxi txãa piçthê'j eçx luuku vxitnisa' wê't yã'j ropa ji'ph u'pte. Txã'wê uyçxa wala ũukhtxi.

16 Txajũ' ma'wê yũuçxa eçx luuku vxitnisa katxhini vxite' kîh yũuçxa kuçxi uuni'swa uysaawe'sxa' jxuka pta'sxtxi nasa thegya' pa'jsatxi's.

17 Txajũ' nasa' Jesusa's ũusçxa we'wetx txãawe'sx kiwejũ u'khan.

18 Aça' Jesusa' ki' sxawedxa' barkote khêjeçpkaçxa', eçx luuku vxitnijũ katxhisa' wala pxthaa we'wek pe'jçxa u'khan.

19 Nawa Jesusa' pe'jna u'jmée na'wêk jxkaah:
—Iidx yatna me'j, sa' iidx nwe'sxtxi pta'sxine'ga idxa's Dxus peeygãhçxa ma'wê ew yũuni'swa.

20 Txajũ' txãa piçthê'ja' u'jçxa, Dekapolis çxhabsu jxuka pta'sxku Jesus ma'wê yũuçxa nuykatxhini'swa. Aça' nasa' wala kuh yaaki'tx jxukaysa.

*Jairo niisa vxite' Jesus atxhte jxa'dxsa
(Mt 9.18-26; Lk 8.40-56)*

21 Txajũ' Jesusa' îkh wala kutejũ barkote khêeçxa pesahçxa kxtee ũste', nasa wala pa'jtx txajx ũsnite.

22 Aça' judiwe'sx pkhaakhenite npiiçthê'jsa Jairo yaasesa' Jesus tasxte peejxũkweçxa

23 na'wêk pxthaa we'we:

—Adx niisakuê' uuçyã'ja', aça' uukahmén myuh jxa'dxya' iidx kuseju jîte',

24 txãa yakh u'kh Jesusa'. Aça' nasa iiméh wala pehnaçxa, dxi'the zuuna'çxáatx u'jweç yu'.

25 Aça' txãa nasa ksxavxyte teeçx u'y kakwe yu' vxyaate doce anxuyã'j ãçã'na u'jusak kaseh.

26 Sa' txãa ãçã'sa' wala pxthaa yuusa yu'k yu'çe'jsatx paapëjxna. Sa' makwe yu'çe weyna txajx ji'phuni jxuka pçuutewa, kîh yuhwa yu'çe yuumée jweeíçxáak jxthaakwena u'jweç yu'.

27 Txajũ' txãa u'ya' Jesus kîh yũusaatewa jiyuçxa' paaçte e'su kũhçxa, kpaajxa'dxku txajx atxhkhẽ.

28 Txã'wẽ Jesus atxhkhẽ kpaajxa'dxçxaçxáa katxhi'nja sũhçxak txã'wẽ yũu.

29 Sa' txã'wẽ jxa'dxiçpkaçxha', kakwe yu' vxyaame', aça' txãa dudtey txajx kakwete wêt yã'kh yajkx.

30 Txajũ' Jesusa' teeçx ãçã'sa txajx atxhkhẽ jxa'dxçxa katxhini's jiyuk, sa' nasaa ksxavxyte u'jweçíi yu'thegçxa', na'jîk:

—¿Kimga adx atxhkhẽ jxa'dx? jîte',

31 Pedrowe'sxa' na'wêtx pas:

—Nasaa ksxavxyte zuuna'çxáa u'jweçgu sa' ¿ma'wêga kimga jxa'dx jîna we'wé'? jîtewa,

32 Jesusa' nasaa ksxavxysu thegu'gku kim jxa'dxtewa uyya'.

33 Txajũ' txãa u'ya' txã'wẽ naa dudte ew katxhini's îsxiimée pta'sxna ùukhna Jesus tasxte yayan kũhçxa peejxũkwek.

34 Aça' Jesusa' na'wêk we'we:

—I'kwe' ũusuh jxuka yajkxçxane'kwe katxhiya' sũhçxa adx tasxte utxáa, txãa pa'ga katxhini i'kwe neeyũu. Æçxha' ãçã'mée wêt me'jwe weçxana jîk.

³⁵ Jesusa' txã'wě we'wena nee ũsiyna, Jairo yatu yuusa kũhçxa' Jairo's pta'sxtxi:

—Iidx niisakuē' uuyã'kh, aça' kuçx pa'pçxunu kaapiya'jsa's pe'jna u'jya' jite',

³⁶ Jesusa' wēsē'jçxa, Jairo's kvxiisxa'kh na'jĩna:

—Nxusnu. Adx ewuwa'ja'sçxáa myajkx jĩçxa',

³⁷ Jesusa' vxite yuutxi's pe'jmée, pxakhsa Jakobo Juan vxite' Pedro txãawe'sxçxáatxku pe'jçxa u'j.

³⁸ Sa' Jairo yatte pa'jçxa', uyku nasa wala ũ'nena ũste.

³⁹ Sa' dxiite u'kaçxa we'wek:

—¿Kĩjxa'kwe txakwe wala ũ'né'? Luuçxa' uunime', Ĩ'neeçxáa deeni' jite',

⁴⁰ nasa' Jesusa's npeevxysxijkatx. Aça' Jesusa' nasatx jxuka eka kutxi'jçxa, txãa luuçx neywe'sx vxite' txãa yakh yuusa tekhsa txãawe'sx yakh uusáa ũsnite utxaaçxa,

⁴¹ kuseju pu'kisçxa na'wěk we'we:

—Talita kumi—txã' na'jĩni': Ijçxa'sthu we'we' mkiiteçx jĩni'.

⁴² Txã'jĩçpkaçxha' txãa uusá' kiiteçxa u'juya' ājāk. Aça' Jesus txã'wě uusá's ki' ĩtxĩ vxitte uyçxa', wala kuh yajkxtxi.

⁴³ Txajũ' Jesusa' wala neewe'wek maa yuhtxwa pta'sxkahnén, sa' txãa luuçxa's puuçkaakh. Txãa luuçxa' doce anxu ji'phsak yu'.

6

Jesusa' Nasaretna u'jni
(Mt 13.53-58; Lk 4.16-30)

¹ Jesusa' txãa çxhabu kasehçxa', txajx u'pni çxhab Nasaretnak sxawedna u'j txãa yakh u'jusawe'sx yakh.

² Sa' sapatu jxkaase ente' judiuwe'sx pkhaakhenitek kaapiya'jna ũsu', aça' nasa jxukaysa wēsē'jçxa', kuh yajkxna na'jĩtx:

—Naa piçthē'ja' ¿mteega txakwe wala kĩjxa'wa piya? ¿Kim kaapiya'theki'k txakwe wala kĩjkĩh yũuya'wa ājā'?

³ Naai' kwe'sx jiyunisa karpintero' Maria nçxi'k. Sa' txajx nyakhtxiwa jũitha'w, Jakobo, Jose, Judas, Simon txãawe'sxta'. Aça' txajx npe'sxwe'sxwa naa çxhabtey u'pta'. Txã'wē kwe'sx jiyunisa' jĩçxatx Jesus kaapiya'jni's nwēesē'jya' wa'l.

⁴ Txajũ' Jesusa' na'wēk we'we txãa nasatx:

—Mteewe'sxwa Dxus yuwe pta'sxsa yu'sa' wa'lmeetx jxpaga'. Nawa peekx kiwetewe'sx yu' jxpaga'çmeeta' vxite' peekx nwe'sx, peekx yattewe'sx.

⁵ Txã'jĩçxa' kxteea' mazkuēçxáa nuykatx-hiçxaçxáa jwee yu' kĩhwa yũume'.

⁶ Sa' Jesusa' nxusnak neeyũu, txã'wē txajx kiwetewe'sx nwēesē'jmeete.

Txajũ' Jesusa' vxite çxhabsuk pta'sxya' kaseh.

Docesatx Dxus yuwe's pta'sxya' kaahni

(Mt 10.5-15; Lk 9.1-6)

⁷ Sa' txãa yakh u'jusa docesatx pa'yaçxa', eçx luuku vxit-satx nasa ũusu kutxi'jya' ājāwa'ja's ũsçxa', e'z e'zku kaah.

⁸ Nawa khãabuçxá's atçxa kĩh yuhwa tu'sméek u'khaah, ya'ja, vxyu, kaame txã'wēsatsx.

9 Sa' pelgatxiçxáa paatçxa teeçx kmiisa yakhçxáak u'khaah.

10 Sa' na'wē yūuwa'ja'sku pta'sx: Maa yatte paadejxa' pa'jyā'jçxa', kxteeçxáa paadehna ũsune'kwe txajū ki' kasehna u'phkaçx.

11 Sa' mteeíi yu' i'kwe'sx pta'sxni's wēsē'j wēemeçxa yat pki'jmeete', txāajū kasejene'kwe i'kwe'sx çxidate kiwe tuhda's sakweekweçxa, kxah yuuwesa yuutxna. Isath we'we': Dxus kastigāywa'j en āhte', txāawe'sxa' Sodoma Gomoçxa çxhabetwe'sxte jxthaakwe kastigo's knayuutxna txā'wē i'kwe'sxtxi jxpa'gaya' wa'lpa'ga.

12 Txā'wē Jesus jxkaahte', txāawe'sxa' kasehtx Dxus yuwe's pta'sxna, pkaltxi nvxihtçxa Dxus tasxte misxawedwe jīna.

13 Sa' eçx luuku vxit-satxwa nasa ũusu kutxi'jna maazkuēe āçā'satxwa aceite dxik-thekhē awna nuykatxhitx.

Juan Bautista uuní

(Mt 14.1-12; Lk 9.7-9)

14 Txā'wē Jesus kījkihwa ew yūuni's ne'jwe'sx Herodes jiyuçxa':

—Juan Bautistane' uuçxawa ki' itxī yuu, txāasane' kījkih yūuya'wa ājā' jīte',

15 vxite nasa we'weçxa':

—Naa piçthē'ja' Dxus yuwe pta'sxsa Eliasna jī'tx. Naapkaçxha' vxite we'weçxa':

—Txāniiteywa ma'wēta Dxus yuwe pta'sxsa kaseje', txā'wēysana jīnatx ũsu'.

16 Nasa txā'wē we'wete', Herodeswa we'weçxa':

—Juan Bautista txhikha's na'wě kaaspě'the'th txãane' ki' itxĩ yuuçxa kiite jĭk.

17 Herodesa' Juana's na'wě yuuçxaga kiikhe'j: Herodesa' Juana's kadenaju tudçxa karcelte ktx-aaja'khu'ga, Herodias ahçeçxa ewméee yuwe ũspa'ga. Txãa Herodiasa' Fxelipe nyuuk yu', aça' Fxelipe yu' Herodes nyakhíçxáak yu'. Nawa Herodesa' Fxelipe nyu Herodiasa's kusa'jçxa tx-ajx nyu na'wěk jxpe'j.

18 Txãa pa'ga ku'ga Juana' Herodesa's na'jĭna yu'kxpeh: Iidx yakhthě'j nyu's kusa'jçxa' iidx nyu na'wě jxpe'jni' ewme' jĭni's

19 Herodias jiyuçxa', Juana's ahçeçxa ikh wěeçxawa ãjã'çmeeku'ga.

20 Juana's Herodias ikhya' ãjãkahmén, Herodesa' karcelteku'ga ktxaaja'j nwe'wena. Juana' Dxus dxi'pte kĭhte yuhwa jxpubamée wala ew fxi'zesatewa Herodesa' jĭine' yu', txãasane' ũukhçxa nwe'we, sa' Juan pta'sxni's Herodesa' kxtey yuuçmeeçxawa wa'lmeeku'ga weçxana wēsē'je'.

21 Herodesa' txajx upxni en anxu ãa iisak fxiesta vxitu'. Txãasak teeçx ente' fxiesta ki'p txajx jxkaahni npiiçthě'jsa vxite' Galileate jx-tuhthesatx pi'kxçxa. Txãa fxiestatene' Herodi-asa' Juana's ewméee yũuwa'ja's uy.

22 Txajũ' Herodias niisa' txãa fxiestate pa'jçxa' wala zhiçxkwe ku'jne' pi'kxnasa dxi'pte. Aça' ne'jwe'sx Herodes uyçxa' na'jĭku'ga txãa kna'sa's:

—Ijçxa kĭh pějxtewa, adxa' ũsu'nja.

²³ Dxus uyte, içxa pēyni's kīhnawa ūsuçxá'nja, meeçxa' adx jxkaahna ūsni kiwe's pějxyuhtewa pxāhn txuhdeçxa ūsu'nja jīte',

²⁴ txāa kna'sa' kasehna u'jçxa, txajx njī'ja'sku'ga paapējx:

—¿Kīh pēyi'ki'th? jīna. Aça' njī'j paşçxa':

—Juan Bautista dxikthea's mpēyçxi jīnaku'ga jxkaah.

²⁵ Txajū' txāa kna'sa' Herodes tasxte ki' kūhçxa':

—Ăçxhíi Juan Bautista dxikthea's plaatute akhçxa mah jīte',

²⁶ ne'jwe'sx Herodesa': Kīh pějxtewa ūsu'nja jīna nasaa dxi'pte jurāyyā'jçxa', ĩsxiiya' ājāmeeku'ga.

²⁷ Txajū' Herodesa' dudtey teeçx soldau's kaakhu'ga Juan dxikthea's nikxya'.

²⁸ Aça' txāa soldau' karcelna u'jçxa', Juan txhikha's spē'thçxa, plaatute akhçxa jxūna kūjku'ga txāa kna'sa's ūsya'. Aça' txāa yu' jxpa'gaçxa', txajx njī'ja'sku'ga dukh.

²⁹ Txā'wē yūute', Juan yakh u'jusawe'sx jiyuçxa', txāa uuni kakwe's kiisçxa pedaaku'ta. Txā'wē yūuni'sne' Herodesa' yajkx.

Cinko mil nasatx Jesus sã'jīni

(Mt 14.13-21; Lk 9.10-17; Jn 6.1-14)

³⁰ Txā'wē e'z e'z jxkaahnisawe'sxa' Jesus tasxte ki' sxawedna pa'jçxa', txāawe'sx ma'wē kaapiya'jna kīhçxa yūuçxawa Jesusa's jxuka pta'sxtxi.

31 Txã'wẽ nasa txakwe wala pa'jna ùste', txãawe'sxa' ù'wa'j en yuhwa uyméetx fxi'zena ùsu'. Txãa pa'gak Jesus we'weçxa':

—Mejkawe, dudte jxkaaseya' nasaa yatmeesu jĩ'.

32 Txajũ' Jesusa' txãa yakh u'jusawe'sxçxáatx pe'jçxa, barkote khêeçxa u'kh, nasaa yatmeesu pa'jçxa jxkaaseya'.

33 Txã'wẽ Jesus u'jweçte nasa wala uyçxa', mtee pa'jya' u'jweçtewa jiyutx. Txãasatx txãawe'sx khuẽ'y yaçte pa'j Jesus pa'jwa'the maa çxhabuwe'sxwa wuwuuçxáa u'jçxa.

34 Aça' Jesus barkoju kasejeççxa', uyku nasa wala kuh pkhaakhena ùste. Sa' txãawe'sxtxi's peeygãjk txã'wẽ piisxáa namu ji'phmeesa na'wẽ txãawe'sxçxáa ùste. Txajũ' Dxus yuwe's wala kaapiya'kh.

35 Kxtee kaapiya'jna ùsiyna kusuçte', txãa yakh u'jusawe'sxa' txajx tasxte utxaaçxa na'wêtx we'we:

—Aysu nasaa yatmeete ùsiyna, kusuça'.

36 Aça' nasatxi' mkaah, kxah yat-su meeçxawa çxhabkuẽ utxasu ùsta' kxsũ pa'jçxa ù'wa'j weyu-utxna. Txã'wẽme' ayte' kĩhwa ji'phmeeta' jĩte',

37 Jesus pasçxa':

—I'kwe'sx mpuuçwe jĩnak jxkaah.

Aça' txãawe'sxa' na'wêtx pas:

—Kwe'sxa' doscientos peso pan weyya' u'jçxa puuçuwá'nja'w jĩte',

38 Jesusa' pějxku:

—¿Maz pan ji'phkwe? Me'jwe thegya' jĩna.

Aça' pan uyçxa', pta'sxtxi:

—Tahç pan, e'z wedxçxáatha'w uy jĩna.

39 Txajũ' Jesusa' nasatxi' txaksũ kaçxkaakh fxiifxii txuteeçxa.

40 Aça' cien ãh vxite' cinkwenta kxaztxi fxiifxii txuteeçxa kaçx.

41 Naapkaçxha' Jesusa' taç pan e'z wedxtxi uweçxa, cielute pagayçxa Dxusa's weçxana'wa pantxi pe'ltedeçxa txãa yakh u'jusawe'sxtxi' ũsku, nasatx jxuka ũsu'skahn. Sa' wedxtxiwa txã'wēyku ũsu's jxukaysatx.

42 Txã'wē yũute', jxukaysa ũ'çxa txiktxi neeyũu.

43 Txajũ' txãa pan vxite' wedx pe'ltedenisa neeyũute' pkhakhçxa', doce kanastate utatx pkhakh.

44 Aça' nasa yu' piçthē'jçxáatx isani cinko mil ãhtx yu'.

*Īkh kajkwega Jesus u'juni
(Mt 14.22-27; Jn 6.16-21)*

45 Txajũ' Jesusa' txãa yakh u'jusawe'sxtxi barkote kaateka'jçxa yaçte kaakh Beçaidan. Txã'wē yũuçxa' txãa yu' kxtee neeyũuk nasa txuteena u'jsatx weçxana.

46 Sa' nasa jxuka txuteena u'jweçpkaçxha', Dxus yakh puutx we'weya' u'kh thã'the.

47 Jxuka çxhi'dxna jxã'jaçte', barko' ĩkh pxãjũy u'jweçku yu', Nawa Jesus yu', ĩkh kutetee ũsĩçxáak yu'.

48 Sa' khikhyna sējeçte', Jesusa' uyku Beçaidan u'jsawe'sxtxi's wejxa yupte, barko's kaajxa' çxhãçxhamée ĩkhsu u'jute.

Txajũ', Jesusa' txãawe'sxtxi kpajkxya' îkhsu u'jçxa, txãawe'sx pukasu utxa sêhçxa, barko's phyahçna skhêuuçku yu'.

⁴⁹ Aça' barkote u'jsawe'sxa' txã'wê îkhsu u'jweçte uyçxa', eçxa'stha'w uy sũhçxa sustxi pebé.

⁵⁰ Txã'sa' jxukaysatx uyçxa ũukh. Naap-kaçxha' Jesusa' we'wek:

—Ũukhnuwe. Adxthu jĩna.

⁵¹ Txajũ' Jesusa' barkote khêjeçpkaçxha', we-jxa' yujuk. Aça' txãawe'sxa' iiméh wala ũukh yajkxna kuh we'wenatx neeyũ.

⁵² Txã'wê Dxus Nçxi'kçxa kĩjxa'wa ajãwa'jsaçxak kuhmêe pan yakh nasa txaazkuêesatx sã'jĩ' sũhwa'j yu'sa' ji'phmeene'ta yu', txãasatx txakwe wala kuh yajkxna neeyũ.

Genesarettewe'sxtxi Jesus nuykatxhini

(Mt 14.34-36)

⁵³ Txajũ' Genesaret kiwete pesahçxa', barko's îkh pukatetx tudçxa txah.

⁵⁴ Aça' barkoju sa'jaçpkaçxha', txãa kiwe-suwe'sx nasa' jiyutx Jesus pa'jni's.

⁵⁵ Sa' txãa kiwesu açã'satx jxuka pkhakhçxa yakhna pa'jtx Jesus mtee ũstewa.

⁵⁶ Txajũ' Jesusa' çxhabna ma'k u'j, meeçxa' yat-su ma'k pa'jya' u'j, meeçxa' dxi'the ma'k u'jweç yuu nawa txajx skhêwwa'jsutx açã'satx khikhe'. Txã'wê yũuçxatx skhêuuçte' wala pxthaa we'we', txajx atxh vxiçteçxáawa açã'satx khya'dxi'khan. Aça' maawa txajx atxh vxiçteçxáawa jxa'dxsa', jxuka katxhiçxatx neeyũ'.

7

Nasa's ewmée vxit-sa
(Mt 15.1-20)

¹ Txajü' fxariseowe'sx vxite' Dxus leya's kaapiya'jsawe'sxwa Jerusalenu pa'jçxa Jesus tasxte utxaatx thegya'.

² Aça' Jesus yakh u'jusawe'sxa' kusekhê' yu' kaahmée ü'weçte uyçxa', açewe'wetx fxariseowe'sxa'.

³ (Yaçgawe'sx ma'wê jxkaathe' Judiuwe'sxa' jxukaysa na'wê kuh jwed yûuwa'ja'stxi nwêesê'jê' ewmeesa pëethekahmén jïçxa:

⁴ Merkaujü pa'jçxa', kusekhê' yu' kaahwa'ja' jï'tx. Sa' waso, mitxh, kîhwa iijxûni çam yuutxi' jxuka kajkwekhê' yu' kaahçxa iijxûwa'ja' jînatx kaapiya'ja'.)

⁵ Txãasatx fxariseowe'sx vxite' Dxus leya's kaapiya'jsawe'sxa' na'jîna Jesusa's pëjx:

—Idx yakh u'jusawe'sxa' çkîh yûuçxata yaçgawe'sx kaapiya'jnitxi' kxtey yu'çmée, kusekhê' yu' kaahmée ü'wé'? jîte',

⁶ Jesusa' na'wêk pas:

—I'kwe'sxa' yuwejuçxáa ew we'weçxa', üuste yu' ewméeçxáa yaakxsai'kwe aça' Isaiasa' isa yuh Dxus we'weni's na'jîna fxi'jne':

Naa nasa' yuweju yu' adxa's yaaki'tha'w jïçxawa, Ûusuh yu' adxa's yaaki'çmeeta'.

⁷ Naa kiwete nasaa kaapiya'jniçxá's kxtey yuuna üsçxa,

Txã'wê Dxus jxkaahni'stha'w kxtey yu' jîte', kxul yuhna jîna Dxus we'weni'sku fxi'j Isaiasa'.

8 I'kwe'sxa' Dxus jxkaahni yu'sa' nvxihtçxa, naa kiwega nasaa kaapiya'jniçxá's i'kwe nwēesē'jna wala ew ki'su' na'wē yūuna: waso, mitxh, kījkihtxwa txā'wē i'kwe ki'su' yu' kaahna.

9 Na'jī'th na': i'kwe'sxa' naa kiwega nasaa kaapiya'jniçxá's nwēesē'jna ki'sçxa', Dxus jxkaahni yu'sa' nvxihti'kwe.

10 I'kwe'sx na'wē yūuni's myajkxwe wakx: Moisesa' na'jīnak fxi'j: Iidx tata iidx mama txāawe'stxi' peeygāhna pu'çxwa'ja' jī'k. Aça' txā'wē yūumée, neywe'stxi açewe'wesa' uu ena's ji'phuna jī'k.

11-13 I'kwe'sx yaçgawe'sxa' na'wētç kaapiya'ja': Maa nasawa neywe'stxi peeygāhna pu'çxmée, adx ji'phuni i'kwe'stxi pu'çxwa'ja's Dxusna dukhe'nja jīna we'weçxaçxáa, neywe'stxi' pu'çxmeetewa ewa' jī'tx. Nawa i'kwe'sxa' txā'wē yaçgawe'sx kaapiya'jniçxá's kxtey nwēese'jçxa', Dxus jxkaahni yu'sa' kxtey yu'çmeei'kwe, naasáa Dxus jxkaahnimeeçxáatx i'kwe kījkihnawa jxuka kxtey yu'.

14 Jesusa' ki'kin nasatx we'weçxa' na'jīk:

—Mwēesē'jwe jxukaysa, ew jiyuya':

15 Kīh ũ'wa tutxhteçxáa khēesa yu', nasatx ewmeesa vxitu'çme'. Naasáa ũusuh ewmée yaakxnisa yuuçxáak nasatx ewmeesa vxitu'.

16 Aça' maawa jiyuwa'jsa ũsçxa', jiyune'kwe jīçxak nvxiht.

17 Txajū' Jesusa' nasatx txuteeçxa' yattek u'ka. Aça' txāa yakh u'jusawe'sxa' jiyumeeçxa' pējxtxi txā'wē pta'sxni's.

18 Aça' Jesusa' na'wēk we'wena pta'sx:

—¿I'kwe'sxwa jiyu'çmeewá'kwe? Kĩh ũ'wa tutxhteçxáa khêeçxa', nasatx ewméesa yu' vx-itmeena sũju'çmeewá'kwe.

¹⁹ Txãa pa'gately kĩh ũ'wa ũuste yu' u'kamée tutxhteçxáa khêeçxa', txajũ ki' kaseje'k jĩk.

Jesusa' txã'wẽ we'weçxa': ũ'nisa yu' kĩhwa jxuka ewsaçxaçxáata' jĩçxak txã'jĩ'.

²⁰ Nawa ũusuh ewmée yaakxnisa yuuçxáak nasa's ewmeesa vxitu'.

²¹ Txãa pa'gately, kazx yaakxni, ptamsaçxawa vxite yakh kazx yuuna fxi'zeni, kazx yuuni, nasa ikhni,

²² pesweeni, vxite jĩ's kusa'jçxa ji'phu wëeni, pthãaweni, ĩsxĩni, vxitetx ahçena fxi'zeni, wëesxuni, kazx we'wena fxi'zeni, iiwejçx iiwejçx yajxna fxi'zeni, kĩhtewa ewmeeçxáa yũuna fxi'zeni

²³ txã'wẽ ewmée yaakxnisa' ũustewe'sxta'. Txãasatx txã'wẽ kaaũusuthe'jçxa, nasa's ewmeesa vxitu'.

*Teeçx u'y judiu ji'jmeesa Jesusa's jxpa'gasa
(Mt 15.21-28)*

²⁴ Jesusa' txãajũ kasehçxa', Tiro Sidon çxhab ja'dasuk pekũjxa' u'j. Sa' kxsũ pa'jçxa', teeçx yatte u'kaçxa, kim yuhwa jiyu jxthãasme'. Nawa kim yuhwa jiyunimeete u'juya' yu' ãjãme'.

²⁵⁻²⁶ Txajũ' teeçx u'y Sirofxenicia kiwetewe'sxa' Jesus pa'jni's jiyuçxa pa'kh. Sa' tasxte pee-jxũkweçxa pxthaa we'wek:

—Niisa ji'phthu txã'sa' eçx luuku vxit-sak iiyamu. Aça' txãa eçxa's nuukutxi'jine'ga ũusu jĩna pi'kxte',

²⁷ Jesus pasçxa na'jĩk:

—Mũythaswe, luuçx khuẽ'y ù'kahn. Txã'wẽ luuçx ù'wa'ja's kusa'jçxa alkutx ùswa'jme' jĩte',
²⁸ txãa u'y pasçxa':

—Isa yuh we'we'g, txã'wẽ yuja'. Nawa alku' mesa dxiisu ùsçxa', pejka ù'wẽ'tx luuçx ù' pe'yaçxáatxwa jĩte',

²⁹ Jesus pasçxa':

—Isa, txã'wẽ yuja'. Aça' me'jwe, i'kwe jx-thãasni's uyuune'kwe, eçx luuku vxit-sa' i'kwe niisa ùusu kasejxã'kh jĩte',

³⁰ txãa u'ya' yatna sxawedçxa uyku, eçxa' ùusu kasehte' wêt yã'j kamaga ùste.

Teeçx piçthẽ'j wẽse'jya' we'weya'wa ãjasame's Jesus nuykatxhini

³¹ Jesusa' ki'kin Tiro kiwejũ kasehçxa, Sidon çxhabuy vxite' Dekapolis kiwey uykhẽwna u'jçxa, Galilea ìkh walatek pa'j.

³² Kxteea' teeçx piçthẽ'j wẽsẽ'jya' we'weya'wa ãjãsame'stxi Jesus tasxte nuypa'jçxa pxthaa we'we nuykatxhikahn.

³³ Aça' Jesusa' txãa ãçã'sa's nasameete fxii pe'jna u'jçxa, thũ'wẽ kafxte pdxi'p jxa'dxna'wa, txajx fxne'sxa's kuse vxiçte kuuçhe'jna', thunetewa jxa'dxku.

³⁴ Sa' ùusdxì'na cielute pagayçxa:

—ìEfxata!—jĩk, tee phaate jĩçxak txã'jĩ'.

³⁵ Txã'jĩçpkaçxha', thũ'wẽ kafxa' phaateçx, aça' thunewa ewuute', ew we'weya' ãjãk.

³⁶ Txajũ' txãa nasatxi' Jesusa' wala neewe'wek, txã'wẽ yũuni's kim yuhtxwa pta'sxkahnén. Txã'wẽ ew neewe'wetewa, jwee'ìçxáatx mtee mteewa pta'sxna jxã'j.

³⁷ Txã'wě yũute', nasa jxukaýsa wala kuh jwed yaaki'tx na'jĩna:

—Ăçã' ma'wěsatxwa jxukak pu'çxhi'. Wěsě'jya' âjāsameetxwa kwěesě'je'kh, sa' we'weya' âjāsameetxwa kwe'we'je'kh jĩ'tx.

8

Kuatro mil nasatx Jesus sã'jĩni

(Mt 15.32-39)

¹ Txãa entey nasa iiméh wala kuh pkhaakheçxa kĩh yuhwa ũ'wa'j ji'phmeete', Jesusa' txãa yakh u'jusawe'sxtxi pa'yaçxa na'jĩk:

² —Naa nasa' tekh en yã'j adx yakh ũsta', nawa kĩh yuhwa ũ'wa'j ji'phmeeta' aça' adxa' peeygãja'th.

³ Kĩh yuhwa puuçmée yatna kaathe', maai' yu' jxu'juwe'sxta' na' wěeçxa dxi'the çxhãçxhameetxna jĩte',

⁴ txãa yakh u'jusawe'sx pasçxa':

—¿Ma'wě puuçya' ya'âjãkx, aysũ' nasaa yatçxáa yuhwa meeta' aça'? jĩte',

⁵ Jesus pějçxa':

—I'kwe'sxa' ¿maz pan ji'phkwe? jĩte':

—Sieteçxáa ji'ptha'w jĩnatx pas.

⁶ Txajũ' Jesusa' nasatx kiwesu kaçxkaahçxa', siete pantxi jxpa'gaçxa Dxusna weçxana'wa, pe'ltedeçxa txãa yakh u'jusawe'sxtxi ũsu'sku, nasa txazkuéesatx puuçkahn. Aça' txãawe'sxa' kxtey yuutx.

⁷ Sa' wedxwa ji'phu'tx kuhmeekwe, aça' Jesusa' Dxusna weçxana'wa, txãa wedxtxi tx-udeedekaakh.

⁸ Aça' jxukaysa txiktxi ù'. Txãa ù' kijxaate' siete kanastate utatx pkhakh.

⁹ Txãa ente txã'wě ù'sa' kuarto mil ähtx yu'. Txajũ' Jesusa' nasatx kaahna'wa,

¹⁰ txãa yu' barkote khêek txãa yakh u'jusawe'sx yakh Dalmanuta kiwen u'jya'.

*Fxariseowe'sx cieluju kîhçxáawa
kaavxya'ja'khaahni*

(Mt 16.1-4; Lk 12.54-56)

¹¹ Kxtee pa'the', fxariseowe'sxwa pa'jçxa Jesus yakh puutx we'wetx. Sa' ma'wě yūutewa jiyuya' Jesusa's pějxtxi:

—Cieluju kîhçxáawa mkaavxya'ja'j jîna.

¹² Txã'jîte', Jesusa' wala nxus yajkxna na'jîk:

—Naa nasa' ¿kîjxa'ki'tx txã'wě cieluju kaavxya'ja'j jxthãasu'? Isa yu' txãa nasatxi' kîhwa kaavxya'ja'jnimée wejx ewna jîk.

¹³ Txã'jîçxa', nasatx nvxihtna' ki'kin barkote khêena'wa îkh kuten u'kh.

*Fxariseowe'sx kaapiya'jni's lewadura yakh
kaaja'da'jni*

(Mt 16.5-12)

¹⁴ Sa' peçxkanaçxa ù'wa'j yu' ji'phmée barkote u'jweççatx yajkx. Naasáa teeçx pañçxáatx ji'ph yu'.

¹⁵ Txajũ' Jesusa' na'wěk jxpa'yakx kaah:

—Mpa'yajkxwe, Herodes vxite' fxariseowe'sx lewadura ewmeesa's jîte',

¹⁶ Jesus yakh u'jusawe'sxa' txãawe'sx pwe'sx na'jînatx puutx we'we:

—Pan ji'phmeetha'w, txãa pa'gane' txã'jî' jîtx.

¹⁷ Aça' Jesus wěsě'jçxa na'jîk:

—¿Maa sũhçxakwe txã'wẽ pan ji'phmeetha'w jĩna we'wé'? ¿Ãçxpkaçx jiyu'çmeewá'kwe, pan ji'phmeetewa thëymée sã'jĩni's yaaki'çmeewá'kwe? ¿I'kwe'sx ũuste khêje'çmeewá'?

¹⁸ I'kwe'sxa' yafxju yu' uyçxawa, jiyuya' yu' ãjã'çmeewá'kwe, sa' adxa' kĩhnawa thëymée ãjãni's yaaki'çmeewá'kwe.

¹⁹ Miiyajxwe wakx: Tahç pantxi txudeedeçxa cinko mil nasatx puuçte', ¿maz kanastakwe pkhakh kijxasaatxi'? jĩte', txãawe'sx paşçxa':

—Doce kanastatha'w pkhakh jĩtx.

²⁰ —Aça' siete pantxi txudeedeçxa kuarto mil nasatx puuçte', ¿maz kanastakwe pkhakh kijxasaatxi'? jĩte', txãawe'sx paşçxa':

—Siete kanastate utatha'w pkhakh jĩtx.

²¹ Aça' Jesus we'weçxa':

—Txã'wẽ thëymée yũunisatxi' yaaki'çmeewá'kwe sane'kwe txã'wẽ ũ'wa'j pan ji'phmeetha'w jĩna we'we'.

Teeçx piçthẽ'j uyya' ãjãsame's Jesus nuykatx-hini

²² Txajũ' Jesusa' Beçaida çxhabte pa'the', kx-teea' teeçx piçthẽ'j uyya' ãjãsame'stxi nuypa'j, nuykatxhikahn pxtaa we'wena.

²³ Aça' Jesusa' txãa uyya' ãjãsamée kusete pu'kisçxa, çxhab eka pe'jna u'jçxa', yafxte fxne'sx sxũsna'wa yafxte jxa'dxku. Txã'wẽ yũuçxa pějxku:

—¿Ma'wëçxá' uyu'gá'? jĩte', thegu'gçxa':

²⁴ —Nasa' fxtũu tasx na'wëçxáatx vxya', nawa êsẽ'se'tx jĩk.

25 Txajũ' Jesusa' ki'kin txajx kuseju yafxte jxa'dxku, aça' yafxa' phaate'te' ew uyya' ãjãk.

26 Txajũ' Jesusa' neewe'wek:

—Çxhabsu u'kameene'ga, sa' maa yuhtxwa pta'sxmeene'ga iidx yafxtxi kim phaadetewa jĩnak yatna kaah.

*Pedro' jiyuk Jesusa' Dxus tasxu yuusatewa
(Mt 16.13-20; Lk 9.18-21)*

27 Jesusa' txãajũ ki' u'kh txãa yakh u'jusawe'sx yakh kasehçxa. Sa' Fxilipo vxitni çxhab Cesarea ja'dasuk pekũjxa' u'jweç yu'. Txajũ' dxi'the u'jweçii txãawe'sxtxi pẽjxku na'jĩna:

—Adxa's ¿kimna jĩ'ta nasa'? jĩte',

28 txãawe'sx pasçxa':

—Maai' yu': Juan Bautistana jĩ'tx. Aça' vxite we'weçxa': Eliasna jĩ'tx. Aça' vxite we'wesa': Txãniiteywa ma'wẽta Dxus yuwe pta'sxsa kaseje' txã'wẽysana jĩ'tx jĩte',

29 Jesusa' na'jĩnak pẽjx:

—Aça' i'kwe'sxa' ¿kimna sũju'kwe?

Txã'wẽ pẽjxte', Pedro pasçxa':

—Idxa' Kristo, Dxus tasxu yuusag jĩte',

30 Jesusa' maa yuhtxwa pta'sxkaahme'.

*Jesusa' txajx uuwa'ja's pta'sxni
(Mt 16.21-28; Lk 9.22-27)*

31 Txajũ' Jesusa' pta'sxku:

—Dxus Nçxi'k Nasa Yuusa' wala pkuuuni pa'ga yuuna, sa' judiu nthẽ'jsawe'sx vxite' sacerdote npiiçthẽ'jwe'sx vxite' Dxus leya's kaapiya'jsawe'sx ahçeçxa kiikhe'jetxna. Aça' uuçxawa tekh ente' ki' ãtxĩ yuuna jĩk.

³² Jesusa' txã'wêk ew ãate pta'sx. Aça' Pedro' Jesusa's fxiite pe'jna u'jçxa, yu'kxpejk.

³³ Txã'wê yu'kxpehte', Jesusa' vxitetx yu'thegçxa', Pedro's na'jĩnak pas:

—Eçxthê'j, adx tasxu mtzutée. Idxa' Dzus jxthãasni yu'sa' kxtey yuumée, naa kiwete nasaa yaakxniçxá'sgu kxtey yuu wêjê' jĩçxa',

³⁴ Jesusa' txãa yakh yuusawe'sxtxi pa'yaçxa na'jĩk:

—Maa nasawa adx yakh yuu wêeçxa', peekx kakwe jxthãasni's kĩhnawa jxuka nvxihtçxa yuuçxáa adx yakh yujxa' ãjãne'kwe, makwe thêysa uuwa'j ma'k pa'j nawa txã'sa' yajkxmée.

³⁵ Nawa naa kiwete ãtxĩ fxi'zewa'jçxá's ya'nwe'wesa', Dzus yakh fxi'zewa'j yu'sa' ivxiituna. Naapkaçxha' Dzus yuwe's nwêesê'jçxa adx yakh fxi'zepa'ga naa kiwete ãtxĩ fxi'zeni's yajkxmée ivxiitusa', Dzus yakh fxi'zewa'j yu'sa' ivxiitumeena.

³⁶ Makwe naa kiwetewe'sx yu'sa' jxuka knayçxawa peekx ũus yu's ivxiitute', ¿kĩhteçxá' selpiima'k?

³⁷ Peekx ũusa's ivxiituyã'the', ¿kimçxa' nwe'wema'k?

³⁸ Maa nasawa adxa's jxpa'gaya' wa'lna adx pta'sxnitxwa wa'lutxna nasa ewmeesa açewe'wete aça' txã'wê yũusa's Dzus Nçxi'k Nasa Yuusaawa Dzus angeleswe'sx yakh eena' kweethna kĩhçxa' jxpa'gaya' wa'luna jĩk.

9

¹ Txajũ' ki'kin we'weçxa' na'jĩk Jesusa':

—Isath we'we', ayte ũssa maaíi yu' uumey uyuune'kwe Dxus naa kiwete jxkaajxa' kīini's jīk.

*Jesusa' zhiçkwe yu'ptheçxa vxyaani
(Mt 17.1-13; Lk 9.28-36)*

² Txajũ' seis en skhēwniite', Jesusa' thã'j walate pe'jna u'kh Pedro Jakobo Juan txãawe'sx tekhsaçxáatx. Kxtee pa'the', Jesus kakwe' fxikyku zhiçkwe yu'ptheh txãawe'sx yafxte.

³ Txajx athni ropa' yãdx na'wēk zhiçkwe çxihme yuu; naa kiwete maa yuhwa txã'wē zhiçkwe çxihme yu' thethya' ājāmeetxna.

⁴ Naapkaçxha' Pedrowe'sx yafxte vxyaatx Elias vxite' Moises. Txãawe'sxa' Jesus yakhtxi puutx we'wena ũsu'.

⁵ Aça' Pedro' txã'wē uyçxa', Jesusa's na'jīk:

—Ayte' kwe'sx ũswa'j wala ewa'. Aça' tekh wa' txajaga, teeçxsa' iidx jīi, vxite' Moises jīi, vxite' Elias jīi jīk.

⁶ Pedrowe'sxa' weçxaniite ũukhsa na'wētx neeyũu, txãasak Pedro' weçxaniite txã'wē we'we.

⁷ Txajũ' tãaph kīhçxa aphku, aça' tãaph dxiiju na'wēk we'weni pthūuse:

—Na' adx Nçxi'k wala wedxnisa', aça' txã'sa' nwēesē'jna kxtey myuuwe jīçpkaçxha'

⁸ Pedrowe'sxa' thegu'gçxawa, Moiseswe'sxtxi uymeeta', naasáa Jesusçxáa yã'j ũstetx uy.

⁹ Aça' thã'ju u'jweççxa', Jesusa' Pedrowe'sxtxi' wala neewe'wek:

—Āçxhíi yu' maa yuhtxwa pta'sxmeene'kwe txã'wē uyni's, naasáa Dxus Nçxi'k Nasa Yuusáa uuçxawa ki' ĩtxĩ yuuniijũ pta'sxine'kwe.

10 Txã'wě neewe'weni's kxtey nwēesē'jtx kim yuhtxwa tuuthe'jmée. Nawa txãawe'sx pwe'sx yu' puutx paapēyĩ'tx: Uuyã'jçxa', ¿ma'wě ki' ĩtxĩ yuukx? jĩna.

11 Txajũ' na'wě kaapiya'jni'stxi Jesusa's paapējx:

—Dxus leya's kaapiya'jsawe'sxa' Elias khuē'y yaçte pa'jana jĩ'tx sa' ¿ma'wě yuuwa'jsakx açki'tx txã'jĩ'? jĩte',

12 Jesusa' na'wěk pta'sx:

—Isa, Elias khuē'y yuh yaçte pa'jçxa jxuka pheu'jwa'jsa yu'k aç'a' isa yuh pta'sxi'ne'ta. Txã'wěy Dxus Nçxi'k Nasa Yuusa's we'weçxa': wala pxthaa yuuna nasa ahçeçxa pkxuuni jĩna Dxus libroute fxi'jni ũsa' txãawa isa yuja'.

13 Elia'sa' pa'jana jĩ'tx aç'a' Elia'sa' pa'jyujk, nawa txã'sa' kĳkĳhwa yũutx Dxus libroute ma'wě fxi'jni ũsna txã'wěy.

*Teeçx luuçx wěeçxpa'jsa's Jesus nuykatxhini
(Mt 17.14-21; Lk 9.37-43)*

14 Txajũ' Jesusa' vxitesa neeyũutx kxtee sx-awedna kĳjaçte', nasa wala pkhaakhena ũsu'tx. Aç'a' Dxus leya's kaapiya'jsawe'sx yu' txãawe'sx yakhtxi wala we'wena ũsu'.

15 Naapkaçxha' Jesus yuhtewa jiiimée ũsiyna, Jesus pa'jaçyã'the uyçxa', nasa' jxukaysa ũukh yajkxnatx weçxaya' utxáa.

16 Txajũ' Dxus leya's kaapiya'jsawe'sxtxi' Jesusa' pējxku:

—¿Kĳh yũupa'ga txakwe weeçx we'wena ũskwe? jĩte',

17 txãa nasa wala ksxavxyte teeçxa's Jesusa's na'jĩnak pta'sx:

—Adx nçxi'ka's eçx luuku vxit-sa iiyamute' we'weya' ãjã'çme' txã'snath ayte nuypa'j.

18 Txãa luuçxa' mtee ũstewa eçx luuku vxit yã'the', ki'thtxi ksuusu'jna yuwesu bu'çxçxáak sēhna weté'. Txã'wē yūuna wala talxiça'. Aça' idx yakh u'jusawe'sxtxi' pi'kxyã'th nuykatx-hikahn, nawa ãjãmeeta' jĩte',

19 Jesus pasçxa':

—Dxusa' pu'çxhina sūhwa'j yu'sa' ji'phmeesata' naa nasa'. ¿Bagaçxpkaçx i'kwe'sx yakh pu'çxna ũs ya'watka? ¿Bagaçxpkaçx ãjãmée fxi'ze ya'wakwe? Txãa luuçxa's mneejxūhwe ayte jĩte', nuykūhtx Jesus tasxte.

20 Aça' eçx luuku vxit-sa' txãa luuçxa's kay-wēçxpaja'the', kiwesu wetek yuwesu bu'çxçxáa sēhna.

21 Txajũ' Jesusa' luuçx neya's pējxku:

—Txã'wē ãçã'ni ¿makwe txaçx yuuçna? jĩte':

—Le'çxiik txã'wē yu'.

22 Sa' maa entey yu' txaçxmeynak wēeçxpajçxa ipxte khēena yu'khēwa khēena uupçxãh yuuna u'ju'. Aça' kxahth idx yakh ewupçxãhte', ma'wēçxáawa pu'çxhine'ga peeygãhçxa jĩna pi'ki' jĩte':

23 —Idx yuu txã'wē Dxusa' pu'çxhina sūhte yu', kīhwa jxuka kxtey yuuna txã'wē yaakxa's jĩte',

24 luuçx neya' susku we'wena pxthaa pi'kx:

—Dxusa' pu'çxyujuna sūju'th, sa' adx ũuste txã'wē yaakxwa'ja's jweeíçxáa wala meen kaa-jiyu'j jĩk.

25 Txajũ' Jesusa' nasa wala kuh pkhaakhena utaaçte uyçxa', eçx luuku vxit-sa's na'jĩnak we'we:

—Eçx luuku vxit-sa kwe'we'je'çmeeg, sa' wēsē'jwe'sxte thũ'wētxwa aphgu, nawa açxha' adx we'weni's nwēesē'jçxa ũusu mkaaseh, peena yu' u'kameene'ga jĩte',

26 eçx luuku vxit-sa' txãa luuçxa's sus kweyi'jna kaywēçxpa'ja'jçxa kasejk. Aça' txãa luuçxa' uuníi na'wēk wetena neeyũu.

Kxahtx nasa we'weçxa':

—Açxha' pejka uuk jĩna we'we'.

27 Nawa Jesusa' kuseju pu'kisku, aça' txãa luuçxa' kiitek.

28 Jesusa' txãajũ u'jçxa', teeçx yattek u'ka. Aça' txãa yakh u'jusawe'sxa' pējxtxi:

—Kwe'sxa' ¿kĩh yũuçxakxtha'w eçxa's kutxi'jya' ājāmée? jĩte',

29 Jesusa' pta'sxku:

—Na'wēsa eçxa' thēymée yu' kasehmeena, wala yũunaana Dxus yakh puutx we'wete yuuçxáa kasejena jĩk.

Jesusa' txajx uuwa'ja's ki' pta'sxni

(Mt 17.22-23; Lk 9.43-45)

30-31 Txajũ ki' u'jçxa', Galilea kiwenku u'j. Sa' kxteea' txãa yakh u'jusawe'sxtxik kaapiya'jwa'j ji'phu' naa pa'ga kim yuhwa jiyu jxthãasme'. Sa' dxi'the u'jweççxa', na'wēk txajx uuwa'ja's pta'sx:

—Dxus Nçxi'k Nasa Yuusá's nasa ewmeesa kusete dukhni yuuwa'ja', aça' txãawe'sxa' ikhetxna. Aça' uuçxawa, tekh ente' ki' itxĩ yuuna jĩtewa,

³² txãa yakh u'jusawe'sxa' jiyumeeta', nawa pějxya' yu' ũukhtxi.

*Kim wejx jxthaakwe jxtuhthesakx
(Mt 18.1-5; Lk 9.46-48)*

³³ Sa' Kapernaum çxhabte teeçx yatte pa'jçxa', txãa yakh u'jusawe'sxtxi paapějxku na'jïna:

—I'kwe'sxa' dxi'the yuhçxa', ¿kïjkwe puutx we'we'? jïtewa,

³⁴ txãawe'sxa' thaameçxa pasmeeta' txã'wē dxi'the yuhçxa', ¿maa wejx jxthaakwe walasakx-tha'w? jïna puutx we'weçxawa.

³⁵ Txajũ' Jesusa' docesatx pa'yaçxa kaççxa pta'sxku:

—Maatewa jxthaakwe walasa yuu wēeçxa', iiwejçx yajkxmée maatxwa jxuka selpiïçxa yuuçxáa jxthaakwe walasa yuuna.

³⁶ Txã'jïçxa' teeçx luuçxkuē's txãawe'sx ksx-avxyte txahçxa kusete yakhçxa na'wēk we'we:

³⁷ —Maa nasawa adxna wa'lmée jxpa'gasa' adx na'wēy luuçx na'wēkwesatxwa ahçemée jxpa'gatxna. Txã'wē yūusa' adxna jxpa'gasaçxa txã'wē yuutxna. Sa' adxna jxpa'gasa' adxçxáana jxpa'gamée, adxna kaahsa'swa jxpa'gasa yu-utxna jïk.

*Kwe'sxtxi açesamée yu' kwe'sx yakh
fxi'zesatxna*

(Mt 10.42; Lk 9.49-50)

³⁸ Txajũ' Juana' na'wēk pta'sx:

—Idx ¿ma'jïki'g? Kwe'sxa' teeçx piçthē'j uytha'w txã' eçx luuku vxit-satx nasaa ũusu kutxi'jïk Jesusku jxkaaja' jïna we'weçxa. Nawa

txã'sa' jwee yu' txã'wẽ yũukaahmeetha'w
kwe'sx yakh u'jusame' naa pa'ga jĩte',

³⁹ Jesus pasçxa':

—Txã'wẽ yũunuwe, txãa pa'gatey adx yase's
kxsuusçxa eçx luuku vxit-satx nasaa ũusu
kutxi'jsa' adxa's açewe'wemeena kim yuhwa.

⁴⁰ Maawa kwe'sxtxi açewe'wesamée yu',
kwe'sxtxi pu'çxsa íçxáatxna.

⁴¹ Na'jĩ'th na': I'kwe'sxa' Dzus luuçxi'kwe
naapa'ga maawa i'kwe'sxtxi peeygãhna teeçx
tasa yu'çxáawa yusuna txã'sa' dwení yuuna.

Pkalte kweete'jya'mée jxpa'yakxwa'ja'

(Mt 18.6-9; Lk 17.1-2)

⁴² —Mpa'yajkxwe, txã'wẽme' luuçxkuẽ adxa's
yaakxsatx pkalte kweete'jena txã'sa' txhikhte
skuutxh ũ'khni kweta's tudçxa íkh wala dxiikhẽ
akhwaççxáa, wejx ewna.

⁴³ Meeçxawa iidx kuse txã'wẽ pkalte idxa's
kweete'jeçte', mespẽ'th. E'z kuse yakh uu
kiwete khẽe na'wẽ', wejxwa teeçx kuseçxáa
ji'phçxawa pçumée ãtxĩ fxi'zewa'the u'kani wejx
ewa'. Txã'wẽme' uu kiwete ipx wala seena'sa
bagaçxte yuhwa ũçxhawa'jsame'.

⁴⁴ Kxteea' bagaçxte yuhwa wesa' çxhavxyna
pçuwa'jsameeta', aça' ipx seena'sawa
ũçxhawa'jsame'.

⁴⁵ Txã'wẽy iidx çxidawa pkalte kweete'jeçte',
txã'swa mespẽ'th. E'z çxida yakh uu kiwete
khẽe na'wẽ', wejxwa teeçx çxidaçxáa ji'phçxawa
pçumée ãtxĩ fxi'zewa'the u'kani wejx ewna.
Txã'wẽme' infxiernote ipxa' bagaçxte yuhwa
ũçxhawa'jsame'.

⁴⁶ Kxteea' багаçxte yuhwa wesa' çxhavxyna pçuwa'jsameeta', aça' ipx seena'sawa ûçxhawa'jsame'.

⁴⁷ Txã'wëy iidx yafxwa pkalte kweete'jpçxãh yuuçte', mkuutxi'j. E'z yafx yakh infxiernote khêe na'wë', wejxwa teeçx yafx yakhçxáawa Dxus jxkaahna ũsnite u'kani wejx ewna.

⁴⁸ Txã'wëme' kxteea' багаçxte yuhwa wesa' çxhavxyna pçuwa'jsameeta', aça' ipx seena'sawa ûçxhawa'jsame'.

⁴⁹ Txãa pa'gatey txãa ipxa' kaapçu'ju'jwa'jsame'.

⁵⁰ Nega' wala seelpisa'. Nawa sxũukãhte', ¿ma'wë kselpi'jya' ewuutxki? I'kwe'sxa' nega na'wëy selpiina mfxi'zewe, jxukaysa yakh ewçxáa.

10

Ptamsa txuteewa'jme's Jesus kaapiya'jni (Mt 19.1-12; Lk 16.18)

¹ Jesusa' Kapernaum çxhabu kasehçxa', Judea kiwen vxite' Jordan yu'wala kutenku u'j kxsũ pekũjxa'. Sa' Jordan yu'wala kuteju ũste', wala nasa pkhaakhe'tx txajx ũsnite. Aça' kxteewa kaapiya'ja'kh vxite ahsũ na'wëy.

² Naapkaçxha' fxariseowe'sxa' Jesus tasxte utx-aaçxa' na'wëtx paapëjx, pasya' sxiigte' ewmée vxit-ya' sũhçxa:

—Ptamsaçxawa, nyu's wãatãhte ¿ewmanx? jïte',

³ Jesus paççxa':

—Jiimeewá'kwe Moises jxkaahni's jïna pëjxte',

⁴ txãawe'sx pasçxa':

—Moises jxkaahçxa', nyu's wãatãjxa' ewuweçxte', nyu kazx yuuna fxi'zeni's eçte fxi'jçxa dukhçxak txuteekaja' jïte',

⁵ Jesus pasçxa':

—Moisesa' txã'wẽ yũuwa'ja's nvxiht yujk, nawa peekx nyu kïhwa yũumeetewa wãatãhna fxi'zepa'ga íçxáak txã'wẽ yũuwa'ja's nvxiht, peekxçxáa yu' wãatãjxa' ãjãkahmén.

⁶ Nawa Dxusa' nyafxiitey naa kiwe's pheu'jii e'zúitx ja'daçxajk vxit piçthẽ'j petx u'y yã'jçxa.

⁷ Aça' txãa pa'ga piçthẽ'ja' peekx neywe'sx tasxu txuteewa'jsa', nyu yuuwa'jsa yakh utx-aaya',

⁸ txã'wẽ e'zçxawa, teeçxsaçxáa na'wẽ yuuna pa'jya'. Aça' txã'wẽ yũuniijũ' e'zmée teeçxçxáak yuuna pa'ja'.

⁹ Txãa pa'ga Dxus pũpxçxa nvxiitni ptamsayã'txhi' kim yuhwa txuhdeya' ãjãwa'jsameeta' jïk.

¹⁰ Txajũ' Jesusa' teeçx yatte u'kate', txãa yakh u'jusawe'sxa' txã'wẽ pta'sxni's ki' pějxtxi.

¹¹ Aça' Jesusa' pta'sxku:

—Maa piçthẽ'jwa peekx nyu's wãatãhçxa vxite yakh ptamuuçxa', pkalte weteena, peekx nyu's wãatãhçxa vxite yakh ptamuupa'ga.

¹² Aça' u'ywa txã'wẽy nmi'a's wãatãhçxa vxite yakh ptamuuçxa', txãawa pkalteyçxáa weteena peekx nmi'a's wãatãhçxa vxite yakh ptamuupa'ga jïk.

*Luuçxkuẽtx Jesus bedekĩyni
(Mt 19.13-15; Lk 18.15-17)*

¹³ Txãa e'su' Jesus tasxte luuçxkuẽtx nuypa'jtx Dxus kusete neewe'wekahn. Aça' Jesus yakh u'jusawe'sxa' yuptxi luuçxkuẽtx nuypa'jsatx.

¹⁴ Txã'wẽ yũute', Jesusa' na'jĩnak ũusçxa we'we:

—Luuçxkuẽ adx tasxte yuusaatxi' kuçx yup-nuwe, txãa pa'gatey Dxus jxkaahna ũsnisa' naa luuçxkuẽwe'sx na'wẽsa jĩi íçxá'.

¹⁵ Na'jĩ'th na': maawa luuçxkuẽ na'wẽ Dxus jxkaahwa'j ena's wa'lmée jxpa'gameeçxa yu', bagaçxte yuhwa Dxus tasxte u'kaya' ãjãmeetxna.

¹⁶ Txã'jĩna'wa luuçxkuẽtx yakhna' dxikthesu peekizeçxa Dxus kusete neewe'wek.

*Piçtakx wala ji'phsa Jesus yakh puutx we'weni
(Mt 19.16-30; Lk 18.18-30)*

¹⁷ Txajũ' Jesusa' vxite ahn u'jweçte', teeçx piçtakx dxi'the wuwuuna kũhçxa', Jesus tasxte peejxũkwek na'wẽ paapẽjxna:

—Kaapiya'jsa wala ewsa mpeeta'sx. Adxa' çma'wẽ yũuçxa pçuwa'jmée ãtxĩ fxi'zewa'ja's ji'phuki'th? jĩte',

¹⁸ Jesus pasçxa':

—¿Kĩh yuupa'gaga adxa's ewsa jĩ'? Naa kiwete' teeçx nasaçxáa yuhwa ewsa yu' meeta'. Dxus yuuçxáa ewsa ũsa'.

¹⁹ Idxa' jiine'ga Dxus jxkaahni na'wẽsatxi': Ptamsa' vxite yakh pkaal yuuwa'jme', nasa ikhwa'jme', pesweewa'jme', vxitetx ãsxiina nuywe'wewa'jme', vxitee jĩitx kusa'jwa'jme'. Neywe'sxtxi peeygãhna ewçxáa yũuna fxi'zewa'ja' jĩte',

20 txãa piçtakx txã'wẽ wēsẽ'jçxa' na'wẽk pas:

—Txã'wẽ jxkaahnisatxi' le'çxkuẽjũjx jxuka kxtey yuunath waláa jĩte',

21 Jesusa' txãa piçtakxa's peeygãhna thegçxa' na'jĩk:

—Na'wẽ yũuwa'jçxáa peejxa': Iidx ji'phuni's jxuka txweyçxa, puuple ji'phmeesatx peesya' me'j. Txã'wẽ yũuçxa', cielute ji'phsa yuune'ga. Txã'wẽ yũuçxa adx yakh myuh, makwe seena' nxussa pa'thewa txãatxi' yajkxmée jĩte',

22 txãa piçtakxa' wala ji'phsa yu'k, sa' txã'wẽ wēsẽ'jçxa', wala nxusna u'kh.

23 Txajũ' Jesusa' nasatx thegçxa' pta'sxku txãa yakh u'jusawe'sxtxi:

—Maawa wala ji'phsa yakha' Dxus jxkaahna ũsnite u'kawa'j wala yuh thẽya' jĩte',

24 txãa yakh u'jusawe'sx wēsẽ'jçxa', jiyumée kuh jwed yajkxnatx neeyũu. Aça' Jesusa' áatek pta'sx:

—Naa kiwete ji'phuniçxá's jxthaakwe yaakxxa yakha' wala yuh thẽya' Dxus jxkaahnite u'kawa'ja'.

25 Maawa wala ji'phsa' Dxus jxkaahnite wala thẽy u'katxna. Aça' txã'wẽ thẽysa's yajkxte yu', kamelxo yuhwa thẽymée wáa yũz kafxga u'kaya' ajãtxna jĩk.

26 Txã'wẽ wēsẽ'jçxa', wala kuh yajkxna na'wẽtx puutx paapëyi':

—Txã'wẽte', ji'phsa' çkimçxá' cielute u'kaya' ajama'tx? jĩte',

27 Jesusa' txãawe'sxtxi thegçxa' na'wẽk we'we:

—Naa kiwete nasa' Dxus ũsnite u'ka wẽeçxa txãawe'sx kakwejuçxáa pa'pçxuçxa'

ājāmeetxna. Nawa Dxusna pi'kxçxa yu', thëymée ājātxna. Dxus yakha' kīh yuhwa thëysa meea'.

²⁸ Txajū' Pedro' na'wēk we'we:

—Kwe'sxa' idx yakh yujxa', kwe'sx ji'phuni's jxuka nvxihttha'w kīhnawa jīte',

²⁹ Jesusa' na'wēk pta'sx:

—Adxa' isath we'we': Dxus yuwe ewsa's jxpa'gaçxa adx yakh fxi'ze wēeçxa', kīhnawa jxuka nvxiitutxna yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txā'wēšatx.

³⁰ Aça' txā'wē yūusa' makwe yahçena fxi'zeçxawa txāawe'sx nvxiitniite puutejka jxthaakwe wala uyuutxna naa kiwete'y: yat, kiwe, nyakhwe'sx, npe'sxwe'sx, njī'jwe'sx, nçxi'kwe'sx, niisawe'sx txā'wēysatx. Sa' vxite kiwete', pçumée itxī fxi'zewa'ja's jxpa'gatxna.

³¹ Nawa jxpa'yakxmeete', makwe yaçtewe'sxçxawa, nmehtewe'sx yuutxna; naapkaçxha' nmehtewe'sx yu', yaçtewe'sx yuutxna jīk.

*Jesusa' txajx uuwa'ja's ki' pta'sxni
(Mt 20.17-19; Lk 18.31-34)*

³² Jesusa' Jerusalente pa'jya' u'jweçku yu', aça' txāa yakh u'jusawe'sxa' ūukhçxa e'stetx u'jwe' Jesusa's yaçte akhçxa. Txajū' Jesusa' doce-saçxáatx fxiite pa'yaçxa pta'sxku txā'sa' kīh yūuya'watewa:

³³ —I'kwe'sxa' jii yā'ji'kwe Jerusalente pa'jya' u'jweçtha'w. Aça' kxte' Dxus Nçxi'k Nasa Yuusa's uweçxa dukhni yuuna Dxus leya's

kaapiya'jsawe'sx vxite' sacerdote npiiçthê'jwe'sx kuseté. Aça' txãawe'sxa' ikhwa'j vxitçxa judiu j'i'jmée vxite nasatx dukhetxna ikhkahn.

³⁴ Aça' txãa nasa' npeevxysxijkana peçxujkwena fxne'sx avxythethna txã'wê yũuçxa ikhetxna. Nawa tekx ente' ki' itxĩ yuuna jĩk.

Jakobowe'sx nĩ'j Jesusa's pēyni

(Mt 20.20-28)

³⁵ Txajũ' Zebedeo nçxi'kwe'sx Jakobo vxite' Juan txãawe'sxa' Jesus tasxte utxaaçxa na'wēt̃x pējx:

—Kwe'sxa' idxa'stha'w pēyi' kwe'sx pēyni's kxtey yuukahn jĩte',

³⁶ Jesusa' pējxku:

—¿Kĩjkwe yũu jxthãasu'? jĩna.

³⁷ Aça' txãawe'sx e'zsa' na'wēt̃x pējx:

—Idxa' naa kiwete jxkaajxa' kĩhçxa', kwe'sx e'zsatsx iidx pukakhē pdxi'p kaçxwa'ja's ũsune'ga jĩnatx pējx.

³⁸ Aça' Jesus pasçxa':

—I'kwe'sxa' jiimeeçxa i'kwe txã'wê pēyi'. I'kwe'sxa' adx na'wēy pxthaa yuuçxa uuwa'ja's ũukhmée jxpa'gaya' ¿ãjama'kwe? jĩna pējxte',

³⁹ txãawe'sxa':

—Åja'nja'w jĩnatx pas.

Aça' Jesusa' na'wēk pta'sx:

—Isa, i'kwe'sxa' adx na'wēy pxthaa yuuçxa uuwa'ja's ũukhmée ji'phuyujune'kwe.

⁴⁰ Nawa adx pukakhē pdxi'p kaçxwa'ja's adx ũsu'çmeeth pēysatsx. Txã'sa' txãn ente kim jxpa'gawa'jsa yuuna txã'sçxáa ũsni yuuna jĩk.

⁴¹ Aça' vxite diezsawe'sx txã'wẽ Jakobowe'sx pëyni's wësẽ'jçxa' ùusaçxatx txãawe'sxtxi'.

⁴² Txã'wẽ yũute', Jesusa' pa'yaçxa na'wëk yu'kxpeh:

—I'kwe'sxa' miijajkxwe: Naa kiwete jxkaahsa walasa' nasatx jxuka jxkaaja'tx juuna'çxáa yuuna khaawãsi'jna.

⁴³ Nawa i'kwe'sxa' txã'wëy yuuwa'jsameei'kwe. Makwe jxthaakwesaçxawa, wejxwa vxitetx selpiina mfxi'zewe.

⁴⁴ I'kwe'sxa' walasa yuu wëeçxa', vxitee jxkaahni selpisáa myuuwe.

⁴⁵ Txãa pa'gatey Dxus Nçxi'k Nasa Yuusáa yuhwa txã'sna selpíi jxthãasya' kîhme', wejxwa maazkuëe nasatxwa nwe'wena selpiiya' kîhçxak ya'dukh nxuste uuya'.

Teeçx piçthë'j uyya' ãjãsame's Jesus nuykatx-hini

(Mt 20.29-34; Lk 18.35-43)

⁴⁶ Txajũ' Jerikote pa'jçxa', Jesusa' txãa yakh u'jusawe'sx vxite' kuhsa yakh çxhabu kasehna u'jweçte', teeçx piçthë'j uyya' ãjãsameek dxi'j pukate lmusxnu thãasna u'pu'. Txã' Bartimeok yaase yu', Timeo nçxi'k.

⁴⁷ Sa' Jesus Nasarethuwe'sx utxaaçte wësẽ'jçxa', na'jĩnak sus we'wena u'pu':

—Jesus, Davxid ji'j, adxa's meen peeygãh jĩna.

⁴⁸ Aça' nasa yu':

—Sxuuna' myuu, kuçxgu susu' jĩtewa, jweeíçxáak sus we'we:

—Davxid ji'j, adxa's meen peeygãh jĩna.

49 Txajũ' Jesusa' tudte yujuçxa, pa'yakaakh. Aça' pa'yatx na'jĩna:

—Kiiteçxa ũukhmée myuh, Jesusa' idxa's pa'yaça' jĩçpkaçxha',

50 txajx atxha's nvxihtçxa ũphçxak kiiteçxa Jesus tasxte utxáa.

51 Txajũ' Jesusa' ¿kĩhga yũu jxthãasu'? jĩna pějxte', txãa uyya' ajãsamée pasçxa':

—Adxa' uyya' ajã wějē'th jĩk.

52 Aça' Jesus we'weçxa':

—Kaauyu'juna sũhçxane'ga adxa's pi'kx txãa pa'ga açxha' uyna mneeyũu jĩçpkaçxha' uyya' ajãk, sa' Jesus e'stey u'kh pi'kxna.

11

Jesus Jerusalente u'kani

(Mt 21.1-11; Lk 19.28-40; Jn 12.12-19)

1 Txajũ' Jesusa' Jerusalenna u'jweççxa', e'z çxhabkuẽ Betania Betfxagé utxatek pa'j. Txãa çxhaba' Oliwos vxiç dxi'pgatx neeyũ'. Aça' kxtee pa'jçxa' txãa yakh u'jusawe'sx e'zsatx yaçte kaakh na'jĩna:

2 —Çxhab le'çxkuẽ vxya'k kxtee me'jwe. Sa' kxtee pa'jçxa', teeçx buçxu kim yuhwa a'jnimeesa tudni ũsna txã'sna jxũkhwedeçxa jxũna yuweene'kwe.

3 Txã'wẽ yũuçte kim pēyiwáatxna aça' kwe'sxtxi jxpe'jsak nikxya' kaah nawa ki' kaasxwedu'juna jĩne'kwe.

4 Txã'jĩte', txãawe'sxa' u'jçxa buçxu's uytxi vxitx pukate dxi'j ju'gu tudni ũste. Aça' jxũna u'jya' jxũkhwedeçtxi yu'.

⁵ Naapkaçxa' kxtee thegna ũssa' we'wetx:
—Buçxu's çkĩh yũuya' jxũkhwedeçkwe? jĩna.

⁶ Txajũ' Jesus ma'wēne' kwe'we'j txã'wēy txãawe'sxa' pasteçxáa jxũna kaahtx.

⁷ Txajũ' txãa buçxu's Jesus tasxte nuykũhçxa', txãawe'sx atxhtxi tpegu'gçxa pustxi, aça' Jesusa' a'jçxa u'kh.

⁸ Naapkaçxa' vxite yu' Jesus u'jwa'j dxi'jsu yaçtetx txãawe'sx atxhtxi pusna u'jwe', aça' vxite' ējxã spē'thçxatx txã'wēy dxi'jsu pusna u'jwe' yaçsu.

⁹ Naapkaçxa' yaçte u'jsa vxite' e'ste yuusa txãawe'sxa' na'jĩnatx weyna u'jwe':

—Dxus kaahnisa wala yuh jxtuhthesa yuja'.

¹⁰ Wala yuh ew jxkaajana, kwe'sx yaçgawe'sx Davxid na'wēy. Dxusa's weçxaaga wala ew yũupa'ga jĩ'tx.

¹¹ Jesusa' txã'wēk Jerusalente u'ka dxuus yatte pa'j. Sa' dxuus yatte kĩh ũstewa jxuka thegçxaçxáa ki' kasehna u'kh Betania çxhabnay doce txãa yakh u'jusawe'sx yakh, kusuçyã'kh yu' naa pa'ga.

Higwera fxtũu tasx yũnsame's Jesus açewe'weni

(Mt 21.18-19)

¹² Txajũ' kuskuskhē' Jesusa' Betania çxhabu ki' kasehçxa' wēek.

¹³ Sa' higwera-tasx wala yehçsa ũste uyçxa', thegya' u'kh yũn ji'phwáana sũhçxa. Nawa yũnmée eççxáak ji'ph yu', yũn en meek yu' naa pa'ga.

14 Txajũ' Jesusa' na'jĩnak we'we txãa fxtũu tasxa's:

—Naa fxtũu tasxte yũnni's kim yuhwa ũ'meetxna peena yu' jĩna we'weçte', txãa yakh u'jusawe'sxa' wēsē'jnatx ũsu'.

*Dxuus yatte txweysaatx Jesus kasxisxni
(Mt 21.12-17; Lk 19.45-48; Jn 2.13-22)*

15 Txajũ' Jesusa' Jerusalen çxhabte ki' sxawedna pa'jçxa', dxuus yatte u'kaçxa kxtee kĩjkĩhwa txweyna ki' weyna ũssatx eka kasxisxku, vxyu yu'pthehsa mesa vxite' tub çxihme txweysa kaçxni pagutx jxuka pũsxna.

16 Sa' kxtee kĩjkĩhwa tu'sçxa pa'jsatx kaakũju'jme'.

17 Txajũ' na'jĩnak yu'kxpeh:

—Dxus librute' na'wē fxi'jni ũsa': Adx yata' Dxus yakh puutx we'wena ũswa'j yatçxá' nasa majũwe'sxwa jĩ'k. Nawa i'kwe'sxa' peswée pkhaakhena ũsni kafx na'wēçxáa vx-itçxa ji'phi'kwe jite',

18 Dxus leya's kaapiya'jsawe'sx vxite' sacerdote npiičthē'jwe'sx wēsē'jçxa', ma'wēçxáawa yũuçxa ikhya' ājāwa'ja's pakwetx. Nawa isa ikhya' yu' ũukhtxi, nasa thaakwe kuhsa yu' Jesus kaapiya'jni's nwēesē'jsaçxaçxáa ũspa'ga.

19 Txajũ' jxuka çxhi'dxiçte', Jesusa' txãa çxhabuh kasehna u'kh.

*Higwera fxtũu tasx udxni
(Mt 21.20-22)*

20 Kuskuskhē kusíi kxuy jxkhēuuççxa', higwera fxtũu tasxa' weçete pa'j udxni ũstetx uy.

21 Aça' Pedro' Jesus we'weni's yajkxçxa na'jĩk:

—Mtheg naa higwera fxtũu tasxa's jũ'na we'weçxa': naa fxtũu tasxte yũnni's kim yuhwa ũ'meetxna peena yu' jĩnag we'we txãa fxtũu tasxa' jxuka uhdxga jĩte',

²² Jesusa' na'wêk pas:

—I'kwe'sxa' kĩh pēyiççxawa, kuh jwed yajkxmée Dxusa' kxtey yuuna sũhnaçxáa mpējxwe.

²³ Adxa' isath we'we': maawa Dxusa's txã'wē ũusuh jxuka yajkxna, naa vxiç wala ayjxu u'jçxa ĩkh walate me'j khēeya' jĩtxna açá' kxtey yuuna.

²⁴ Kxtey yuuwa'ja's adxa' jiiçxath txã'wē i'kwe'sxtxi' Dxus yakh puutx we'wekaja' pēyni's jxpā'gayā'tha'w sũhna.

²⁵ Sa' Dxus yakh puutx we'wena ũsí yaakiwá'kwe vxitesa yakh āhmée yũuni's. Sa' txã'wē yajkxçxa', txãa yakh peltunāyya' u'jwene'kwe, kxah i'kwe'sx Tata cielutewe'sxwa i'kwe'sx pkaltxi peltunaĩna.

²⁶ Nawa i'kwe'sx txã'wē vxitesa yakh āhmée yũuni's peltunaĩmeete', i'kwe'sx Tata cielutewe'sxwa i'kwe'sx pkaltxi' peltunaĩmeena jĩk.

Dxuus yatte Jesus juuna' yũuni's pēyni

(Mt 21.23-27; Lk 20.1-8)

²⁷ Txajũ' Jerusalente sxawedna pa'jçxa, dxuus yat-su u'jute', sacerdote npiiçthē'jwe'sx vxite' Dxus leya's kaapiya'jsawe'sx vxite' judiu nthē'jsawe'sx Jesus tasxte utxaaçxa',

²⁸ na'jĩnatx pējx:

—Idxa' ¿kinga saga dxuus yatte txã'wē juuna' yũu? ¿Kinga txã'wē yũuya' jxkaah? jĩte',

29 Jesus pasçxa':

—Adxwa i'kwe'sxtxi' pějx ya'wath aça' adx pëyni's pasune'kwe. Txã'wë yũ' adxwa pta'sxi'nja kim jxkaathe txã'wë yũuçxawa.

30 Sa' pějxku na'jĩna:

—Juan Bautista's ¿kinga jxkaah bautisãyya'? ¿Dxusá', meeçxa' naa kiwega piçthë'já'? Mpaaswe jĩnak pějx.

31 Txajũ' txãawe'sx pwe'sx na'jĩnatx puutx we'we':

—Dxusne' jxkaah jĩ'nja'w aça' txã'wëte' ¿mjĩya'kwe Juan pta'sxni's jxpa'gamée? jĩna pasuna.

32 Meeçxa' naa kiwetewe'sxne'ta jxkaah jĩwaçwa, kxul yuhna, nasa jxukaysa Juana's we'weçxa': Dxus jxkaahnisa' jĩ'tx.

33 Txã'jĩna ũukh we'weçxaçxáa:

—Kwe'sxa' jiimeetha'w jĩnaçxáatx Jesusa's pas. Aça' Jesusa' na'jĩk:

—Adxwa pta'sxme'nja kim jxkaathe txã'wë yũuçxawa jĩk.

12

Mjĩsawe'sx patron nçxi'ka's ikhni yakh kaaja'da'jni

(Mt 21.33-46; Lk 20.9-19)

1 Txajũ' Jesusa' naa ejemplo yakhku kaaja'da'jna pta'sx:

—Teeçx piçthë'ja' txajx kiwete uwa wala uhçxa, ktadxíi jxuka uphku, sa' uwa ee thegwa'j yatwa txahçxa uwa thë'the ũhdeçxa ku'swa'j yatwa fxii txajk. Txã'wë yũuçxak txãa kiwete

mjĩwa'jsatx ew neewe'wena nvxihtçxa jxu'j kiwen u'j.

² Txajũ' uwa thẽ'jwa'j en ähte', txã'sna selpisáa teeçx kaakh kxtee mjĩisatx pẽjxya' txãa jĩi yuuwa'ja's.

³ Nawa txãa kiwete mjĩisawe'sxa' pẽjxna pa'jsa's uweçxa wala pkxuutx, sa' kĩh yuhwa dukhmeetx kaah.

⁴ Aça' kiwe namu' vxite selpisáa ki' kaakh txã'snawa wala wẽesxuna kwet wãatãtãhna dxikthesu kpã'vxittxi.

⁵ Txajũ' kiwe namu' ki' kaakh vxite selpisáa, aça' txã'sa' ikhtxi. Txãa e'su' maazkuëe selpisaawa kaakh, aça' txãawe'sxtxi' maaíi yuutxi' kpã'vxitna, vxitetxi' ikhtxi.

⁶ Txã'wẽ yũute', teeçx nçxi'k wala wedxnisa ji'phuk txã'snak nmehte kaah, adx nçxi'ka's pejka nwẽesẽ'jetxna sũhna.

⁷ Nawa txãa kiwete mjĩisawe'sxa' txãa nçxi'ka's uyçxa': Naa nçxi'k txã'wẽ naa kiwe's uwewa'jsana, aça' txã'sa' ikhçxa kiwe's kwe'sx iiyamu'nja'w jĩnatx puutx we'we.

⁸ Sa' txãa nçxi'ka's uweçxa ikhçxa uuníi kakwe's txãa kiweju kutxi'jtx jĩnak pta'sx.

⁹ Txã'wẽ pta'sxçxa Jesusa' pẽjxku:

—Txã'wẽ yũute', kxtee kiwe namu' ¿kĩh yũukx? Txãa sxawedna pa'jçxa, kxtee mjĩisatxi's ikhçxa kiwe's vxitetx ũsuna sũju'th jĩk.

¹⁰ Dxus librute na'wẽ fxi'jni ũsa' txã'sa' iilëeymeewá'kwe i'kwe'sxa': Yat txaahsawe'sxa': Naa kweta' seelpime' jĩçxa wãatãhtx.

Nawa txãa'ík yat makwesanawa çxhãçxa neewewa'jsa yuuna pa'j.

11 Txã'wẽ neewewa'jsa yuuna pa'jwa'ja's Dxusku vxitçxa nvxiht,

Txãa pa'ga kwe'sx yakha' wala weçxa yuja' çjĩ'çmeena'?

12 Txajũ' Dxus leya's kaapiya'jsawe'sx vxite' sacerdote npiiçthẽ'jwe'sxa' txãa ejemplo' txãawe'sxtxi we'wenitewa jiyuçxa', Jesusa's uweçxa tud wẽetx. Nawa nasatx ùukhçxa tudmée u'jtx.

Gobierno's dukhwa'ja'swa pẽyni
(Mt 22.15-22; Lk 20.20-26)

13 Txajũ' fxariseowe'sx vxite' Herodes nasa txãawe'sxtxi pa'yaçxatx maz kaah Jesus tasxte, kĩh ewmée we'wetewa kpajkxya'.

14 Aça' txãawe'sxa' na'wẽtx paapẽjx Jesusa's:
—Idxa's kwe'sxa' jiitha'w. Idxa' isasaçxá'sgu we'we', Dxus tasxte pa'jwa'j dxi'ja's kaapiya'jna. Sa' nasaa jxkaahna yu'kxpehnitx nwẽese'je'çmeeg, txãa pa'gatey idxa' nasa ewsa na'wẽ thegsatx jiyumey ju'gu yu'çmeeg. Idx çma'jĩki'g? Jxkaahsa Cesara's vxyu dukhte çewmanx? Meeçxa' dukhmeete wáa çewna? jĩna pẽjxte',

15 Jesusa' txãawe'sx ùuste ewmée yajkxçxa txã'wẽ pẽyni's jiyuçxa', na'wẽk pas:

—çKĩjxa'kwe adxa's ewmeete nvxiit wẽeçxa txã'wẽ pẽyí'? Vxyu's mneejxùhwe wakx, thegya'wath jĩte',

16 teeçx vxyu's jxũna kũhtx, aça' thegçxa' na'jĩk:

—Ayte' ¿kiim dxi'pa's ki'pnina, sa' kiim yase's fxi'jnina? jĩte', txãawe'sx pasçxa':

—Cesar dxi'pa's ki'pçxa Cesar yase's fxi'jni' jĩtx.

¹⁷ Aça' Jesusa' na'wëk jxkaah:

—Cesar jĩ's Cesara's dukhwa'ja', sa' Dxus jĩ's Dxusa's dukhwa'ja' jĩte', paapëysawe'sxa' pasya' ãjãmée kuh yajkxnatx neeyũu.

Usaawe'sx ki' ĩtxi yuuwa'ja'swa pëyni

(Mt 22.23-33; Lk 20.27-40)

¹⁸ Txajũ' saduceowe'stxxi paapëjxya' kũh Jesus tasxte. Txãawe'sxa' uusaawe'sxa' peena yu' ĩtxĩ yuumeetxna sũhna yaakxsatx yu'. Sa' Jesus tasxte kũhçxa', pëjxtxi:

¹⁹ —Idxa' jiine'ga, Moisesa' na'wëk fxi'jçxa nvxiht: Maa piçthë'jwa nyu ji'phçxawa, luuçx ji'phumey uute', uusáa nyakha' txãa neeyũusáa u'y yakh kabaana aça' txãate luuçx nyafx-tewe'sxa' uusáa nçxi'k na'wë neeyũuna jĩnak fxi'j.

²⁰ Kwe'sxa' jiitha'w siete piçthë'j pxakhtxi u'p yu'. Sa' nyakh nthë'jsa' iyyuuçxawa luuçx ji'phumey uuk.

²¹ Aça' nyakh e'stewe'sxa' txãa u'y neeyũusáa yakh kabaçxawa, txãawa luuçx ji'phumey uuk. Sa' tekhtewe'sx nyakhwa txãa u'y neeyũusa's iicxáak kaba. Nawa txãawa txã'wëyçxáak yuu.

²² Aça' sietesay teeçx u'ysaçxaçxáana kabana jxã'jçxawa, txã'wëçxaçxáatx yuu. Nmehte' txãa u'ywa uuk.

²³ Aça' uusaawe'sx ki' ĩtxĩ yuu ente', txãa u'ya' ¿maa yakh isa nyu yuuwa'jsakx cielute'? jĩnatx paapëjx.

24 Aça' Jesusa' na'wěk pta'sx:

—I'kwe'sxa' Dxus libru's jiimeei'kwe, sa' Dxus tasxte ma'wě fxi'zewa'ja'swa jiimeeçxa' jxpubana ũsi'kwe.

25 Nawa uusaawe'sxa' ki' ãtxĩ yuuçxa', nyu ji'phuwa'jsa meeta'. Kxte' kaaptamu'jna ũskiweme', txãa pa'gatey cielute' txãawe'sxa' angeleswe'sx na'wěsaçxãa yã'tha'.

26 I'kwe'sxa' jxpubanuwe: Uusaawe'sxa' ki' ãtxĩ yuuwa'jsa yuhta'. I'kwe'sxíwa Moises libru'te iilēeyne'kwe: Kxte' çhũçh yu'kh behna ũsni pxãjũ na'wěk Dxusa' we'we: Adxa' Abraham, Isaak, Jakob txãawe'sx Dxusthu jík.

27 Dxusa' uusaawe'sx Dxusme', txã' ãtxĩsawe'sx Dxusa'. Aça' i'kwe'sxa' wala jxpubana ũsi'kwe jík.

Dxus ley maatewa jxthaakwesa

(Mt 22.34-40)

28 Txã'wě pãapějxte', Jesu sxiigmée pasuçte wěsē'jna ũsu'k Dxus ley kaapiya'jsa teeçxsa'. Sa' txãawa na'wěk pějx:

—Dxus leya' maatewa jxthaakwesa' ¿maana? jíte',

29 Jesusa' pta'sxku:

—Dxus ley maatewa jxthaakwesa nyafxtewe'sxa' na'wě': Israelwe'sx, mwēesē'jwe: Kwe'sxtxi taki'sa Dxusa' teeçx yuuçxá'.

30 Txã'sa' ũusuh jxuka yajkxçxa txãa yuuçxãana selpiina fxi'zewa'ja' bagaçxte yuhwa txutemée uu entepkaçx.

31 Aça' e'stewe'sxa' txã'wěydxia': Peekii ma'wěga ya'peeygãja', txã'wěy mpeeygãh vxite

nasatxwa. Naa ley e'zsa maatewa jxthaakwesata' jīte',

³² Dxus leya's kaapiya'jsa pasçxa':

—Ew yuh pta'sxgu. Dxusa' teeçxçxáa yuh ũsa', açã' vxite Dxus yu' meeta'.

³³ Sa' txã'wẽ ũusuh jxuka yajkxçxa txãa yuuçxáana bagaçxte yuhwa txutemée selpiina fxi'zeçxa, txã'wẽy ma'wẽ peekíi ya'peeygãja'kx txã'wẽ vxite nasatxwa peeygãhna fxi'zeni' Dxusna peesna maazkuẽe niimalwa altalte kabnite jxthaakwe ewsa' jīk.

³⁴ Txajū' Dxus leya's kaapiya'jsa txã'wẽ jxpa'yakx paste', Jesusa' na'jīk:

—Dxus jxkaahnite u'kaya' utxa ũsgu jīk.

Açã' txajūyã'ja' vxite yu' peena pējxmeeta'.

Dxus tasxu yuusa' ¿kiim nçxi'kki? jīna Jesus pēyni

(Mt 22.41-46; Lk 20.41-44)

³⁵ Txajū' Jesusa' dxuus yatte nasatx kaapiya'jna na'wēk pta'sx:

—Dxus ley kaapiya'jsawe'sxa' ¿ma'wēteki'tx Kristo' Davxid nçxi'ka' jīna pta'sxi'?

³⁶ Naapkaçxha' Dxus Espiritu kaayaki'the' Davxida' Kristo's we'weçxa' na'jīk:

Adxna jxpe'jsa Kristo's Dxusa' na'jīk:

Adx pukate paçu ju'gte mkaaçx,

Idxna açesatx idxçxaçxáana nwēese'jwa'ja's vx-itna jxã'phkaçx jīk.

³⁷ Açã' Kristo' ¿ma'wēçxa Davxid nçxi'k yuukx? Davxid íiwa Kristo's we'weçxa': Adxna jxpe'jsa jīk. Txã'wẽ Jesus pta'sxte', nasa txazkuēesay wala weçxana wēsẽ'je'tx.

*Ley kaapiya'jsawe'sxtxi yuuwesa Jesus nvxiitni
(Mt 23.1-36; Lk 11.37-54; 20.45-47)*

³⁸ Txajũ' Jesusa' na'wẽ yu'kxpehnak kaapiya'j:

—Dxus ley kaapiya'jsawe'sxtxi' jxpa'yakx me'juwe. Txãawe'sxa' ropa jxu'jsa athçxatx nasatx weçxaa jxthãasna pekũju' msuuwa.

³⁹ Sa' judiuwe'sx pkhaakhenisuwa kaçxni wejx ewsaçxáanatx pakwé', vxite' sã'jĩya' pi'kxni yat-suwa txã'wẽytxi yu'.

⁴⁰ Sa' vxiudawe'sx kĩh ji'phuni'swa jxuka kusa'jçxatx txãa pesweni's kaapeçxkana'jya' wala jxu'j we'wena lisá'. Txã'wẽ yũupa'ga txãawe'sxa' wejx jxthaakwe Dxus kastigãyni yuutxna jĩk.

*Vxiuda ofxreda akhni
(Lk 21.1-4)*

⁴¹ Sa' Jesusa' dxuus yatte vxuyu ãsxni dxi'pte kaçxçxa thegnak u'pu' ofxreda ãsxya' kũusatx. Aça' maaíi yu' vxuyu wala ji'phsa' seena' wala akhetx.

⁴² Naapkaçxha' teeçx u'y vxiuda puuplesa kũhçxa', e'z vxuyu musxkuẽçxáak akh.

⁴³ Aça' Jesusa' txãa yakh u'jusawe'sxtxi pa'yaçxa na'wẽk pta'sx:

—Naa u'y vxiuda' kĩh yuhwa ji'phmeesaçxawa maa maatewa jxthaakwek akh.

⁴⁴ Vxite yu' akhe'tx, nawa txãawe'sx peejin-imée kijxasaçxáanatx akhe'. Nawa naa u'ya' kĩh yuhwa ji'phmeesaçxawa txajx ũ' weywa'ja's jxukak akh jĩnak pta'sx.

13

Dxuus yat pçuwa'ja's Jesus pta'sxni

(Mt 24.1-2; Lk 21.5-6)

¹ Txajũ' Jesusa' dxuus yatu kasejeçte', txãa yakh u'jusa teeçxa' na'jĩnak we'we:

—Mtheg, naa yata' na'wẽ seena' wala txaahni' kwet zhiçxkweya yakh jĩte',

² Jesus pasçxa':

—Naa yat wala's wá'ga thegu', aça' txã'wẽ yuja'. Nawa jxuka pçuuna, aça' teeçx kwetçxáa yuhwa kēese'jnimeesa yu' neeyũumeena jĩk.

Naa kiwe pçuwa'j en ãjaçte seena'sa vxyaawa'j

(Mt 24.3-28; Lk 21.7-24; 17.22-24)

³ Sa' txajũ kasehçxa', Oliwos thã'j dxuus yat dxi'ptek neeyũ' kxteetx u'j. Kxtee pa'jçxa Jesusa' kaçxçxa u'pte', Pedro, Jakobo, Juan, Adres txãawe'sxa' na'wẽtx paaçte pějx:

⁴ —Bagaçx txã'wẽ dxuus yata' pçuwa'jsakx txã'sa' pta'sxwaça', sũju'tha'w. Sa' txã'wẽ yu-uwa'j en ãjãçte', ¿kĩhçxa yuukx? txã'snatha'w jiyu wējẽ' jĩte',

⁵ Jesusa' pta'sxku:

—Mpa'yajkxwe kaypuba'jwe'sxte.

⁶ Txã'wẽme', wala kasejetxna: Adxii Kristoth jĩna. Txã'wẽ yũuçxa maaíi yuutxi' wala kay-puba'jatxna.

⁷ Sa' i'kwe'sxa' wēsẽ'jene'kwe gweçxa u'pa'sa' aysuwa gweçxa pa'jana jĩni's, nawa ũukhmeene'kwe. Txã'wẽ kxtey yuuyujuna, nawa nmeh en meea'.

⁸ Aça' gobierno' vxite kiwete gobierno yakh puutx puiitxna. Naapkaçxha' puutx jxu'j kiwejũ

pwe'sxwa puutx puiitxna. Mtee mteewa seena' ehd u'jwena. Seená' wějě enwa pa'jana. Sa' nasawa wala susutxna gobiernotx ačewe'wena. Nawa pxthaa nxuswa'j en takhnaçxáa txá'wě yuuna.

⁹ Nawa i'kwe'sxa' jxpa'yakx meswe. Txá'wěme' judiu nthě'jsawe'sx kusete i'kwe'sxtxi dukhçxa, txáawe'sx pkhaakhenite nuypa'jçxa pkxuutxna. Sa' i'kwe'sxa' adxna selpiiya' utxaapa'ga ahçeçxa ne'jwe'sx tasxsu vxite' jxkaahsa tasxsu kuutxa'jni yuune'kwe. Txá'wě kxsü pa'jçxa', jxkaahsawe'sxtxiwa pta'sxya' ājāne'kwe adx kaapiya'jni's.

¹⁰ Nmeħ en utxaaçte', Dxus yuwe ewte nvxi-itwa'jsa's mtee mteewa jxuka pta'sxni yuuna.

¹¹ Txá'wě i'kwe'sxtxi' jxkaahsa kusete dukhya' jxūna u'the', çma'wě pasukxtha'w? sūhna kuh yaakxnuwe ūukhna. Dxusa' txāa dudte kaaūsuthe'jena txā'sçxáa mwe'wewe, txāa pa'gatey i'kwe'sx we'wewa'jsameei'kwe. Dxus Espiritu i'kwe'sx ūuste kaayaki'jwa'jsa' i'kwe'sx we'wewa'ja's, aça' txā'sçxáa we'wewa'jsai'kwe.

¹² Naa kiwete nasa' peekx nyakhtxi ahçeçxa kiikhe'jetxna, aça' neywe'sxwa peekx nçxi'ktxi ahçeçxa kiikhe'jetxna. Txá'wěy nçxi'kwe'sxwa neywe'sxtxi ahçeçxa kiikhe'jetxna.

¹³ I'kwe'sxa' adxna selpiipa'gaçxáa naa kiwetewe'sx jxuka yaaçeni fxi'zene'kwe. Nawa uu entepkaçx Dxus yakh txutemée fxi'zeçxa', ewte neeyūune'kwe.

¹⁴ Na'wě fxi'jni's jiyuya' jxpa'yakx mlēeywe: Dxus yuwe pta'sxsa Daniela' fxi'kh dxuus yatte kazx ewmée yuuna pa'jwa'ja's. Aça' txá'wě kxtey

yuuçte uyçxa', Judea kiwete ùssa nasa' çxhab peeku'j yu'khsuçxaçxáa ùphna kasejene'kwe.

¹⁵ Aça' txã'wê seena' yuuçyã'the', êe yat-su u'psa ùphna sa'jçxawa, kîh yuhwa kutxi'jwa'j en ji'phumeetxna.

¹⁶ Txã'wêy mjîi ehsu u'jusawa txajx atxhçxá'swa yatuh kutxi'jya' pa'jwa'j en ji'phumeetxna.

¹⁷ Txãa ensu' nasa ji'phsa vxite' luuçx ãpãkuê ji'phsa' wala yuh nxus pxthaa yuutxna.

¹⁸ I'kwe'sxa' Dxusna mpi'kxwe, txã'wê ùphwa'j ena' nus ente yuukahmén.

¹⁹ Txã'wême' iiméh seena' wala nxuswa'j en yuuna. Naa kiwe's Dxus pheu'jiyna, bagaçxte yuhwa nxuswa'j en txã'wêsa yu' u'pu'çme', sa' txãa skhêwniijÿyã'ja' bagaçxte yuhwa txã'wêy nxussa yu' u'pumeena.

²⁰ Kwe'sxtxi taki'sa Dxusa' txã'wê seena' nxuswa'j ena's txaçxmée vxitmeete yu', naa kiwete nasa kim yuhwa ïtxî neeyûumeetxna. Nawa txã'wê seena' nxuswa'j en u'puwa'ja's Dxusa' txaçxmeeek vxit txajx nasa txhitxhnisatx peeygãhçxa.

²¹ Txajÿ' maaíi yu' i'kwe'sxtxi na'jïtxna: Myuhwe thegya', Kristo' aye ùsa' jïtxna. Meeçxawa: Me'jwe thegya', Kristo' kxtee ùsa' jïtewa, i'kwe'sxa' kxtey yuunuwe.

²² Txãa ensu' wala ïsxîisa kasehçxa: Kristotha'w jïtxna, naapkaçxha' vxite': Kwe'sxa' Dxus yuwe pta'sxsatha'w jîna pekÿjutxna, kaypuba'j wêeçxa kîjkîhwa kaavxya'ja'jna. Jxpa'yakxmeete', Dxus txhitxhnisa yuhtxwa kaypuba'jatxna.

23 Aça' txã'wě yūuwe'sxte, adxa' dxiikhēy pta'sxiçthu i'kwe'sx jxpa'yakx ũskahn.

Dxus Nçxi'k Nasa Yuusáa seena' zhiçxkwe vxyaana

(Mt 24.29-35, 42-44; Lk 21.25-36)

24 Nawa txã'wě nxusni en skhēwniijũ', seka' çxhi'dxina, aça' a'tewa kweethmeena.

25 Naapkaçxha' estrelxa' cielujũ ũsxitxna, aça' kĭjkĭhwa seena' walasa ēe walate ũstxna txãawa jxuka kēese'jni yuutxna.

26 Txã'wě yūunijũ', Dxus Nçxi'k Nasa Yuusa's uyuutxna tãaph pxãhte seena' zhiçxkwe kweet-hna kĭjaçte.

27 Sa' kĭhçxa' txajx angeleswe'sxtxi jxkaajana txajx nasa txhitxhnisa mtee mteewa ũstxna txãatx jxuka pkhakhkahn.

28 Naa ejemplo's peçxkananuwe: higwera fxtũu tasx u'se yeeçuçte uyçxa', jiyu'i'kwe yūnya'watewa.

29 Txã'wěy na'wě pta'sxthu txãatx uyçxa', jii mfxi'zewe nmeh ena' utxaaçna sũhna.

30 Isath we'we': txã'wě seena' nxuswa'j ena's uyuutxna naa ensu nasa uumey.

31 Cielu naa kiwe jxuka skhēuutxna, nawa adx we'weni' jxuka kxtey yuumey yu' skhēwmeetxna.

32 Nawa txã'wě Dxus Nçxi'k kĭh orate kĭiwa'jsatewa, txãa en yu'sa' kim yuhwa jiimeeta' cielute Dxus angeleswe'sxwa jiimeeta', aça' Dxus Nçxi'k ũi yuhwa jiime', naasáa Dxus yuuçxáa jiia'.

³³ Txãa pa'ga i'kwe'sxa' wala jxpa'yakx meswe, Dxusna yuuçxáa neewe'wena. Txã'wēme' jimeei'kwe bagaçx kīiwa'jsatewa.

³⁴ Txã' na'wē yuuna: Teeçx piçthē'j jxu'j kiwen u'jweççxa', yatu kasehmey selpisaatx teeçxsa na'wēçxah mjīi ūsçxa kxtee jxpa'yakx ūskahn teeçx thegwa'jsa txajana.

³⁵ Txã'wēy i'kwe'sxwa wala jxpa'yakx meswe. Txã'wēme' jimeei'kwe çxhi'dxiçte ma'k yuu, meeçxa' kuspxāh atalx we'weçte ma'k yuu, meeçxa' kusii ma'k yuu nawa pa'jçxáa yuuna.

³⁶ Txã'wēme' yajkxmée ūsiyna, naa dudte pa'jçxáa wáa yuuna.

³⁷ I'kwe'sxçxáatx pta'sxmée, jxukaysatxthu pta'sxi' jxpa'yakx ūskahn.

14

Jesusa's ikhwa'ja's puutx we'weni (Mt 26.1-5; Lk 22.1-2; Jn 11.45-53)

¹ Paskua's ū'ni vxite' pan lewadura ji'phmée ū'ni fxiesta txãa e'z fxiesta ājxa' e'z ençxáak peejx yu'. Txãa ente Dxus leya's kaapiya'jsawe'sx vxite' sacerdote npiiçthē'jwe'sxa' puutx we'wetx ma'wē yūuçxa kimwa jiyunimeete Jesusa's ki-ikhe'jya' ājāwa'ja's.

² —Nawa fxiesta entemée kiikhe'je'nja'w. Txã'wēme', nasa wala susutxna jīnatx puutx we'we.

*Wēt putasá pa'gasa's teeçx u'y Jesus dxikthekhē
awni
(Mt 26.6-13; Jn 12.1-8)*

³ Naapkaçxha' Jesusa' Betaniate Simon wã'jy weeju katxhisa yattek u'p yu'. Aça' kxtee u'pte', teeçx u'y wēt putasá kīh yuhwa ka'dnimeesa wala pa'gasa's atçxak kūh. Sa' fxrasko's uhdçxa Jesus dxiktheekhēk aw.

⁴ Aça' kxtee ũssa' maaíi yu' ũusaçxatx txãawe'sx pwe'sx na'jīna:

—¿Kīh yūupa'gaçxáaga naa wēt putasá txakwe pa'gasa's kxul psuwú'?

⁵ Wejx yuuwa trescientos pesote txweyçxa puupletx pu'çxya' ewne' yu' jīnatx txãa u'ya's ahçena wēesxūu.

⁶ Aça' Jesusa' na'jīnak we'we:

—¿Kījxa'kwe wēesxú'? Kuçx yuunuwe. Na'wē yūuk txã' kxul vxituni yuume'.

⁷ Puupletx peeswaç ewne' yu' jī'i'kwe na' puuplesatxi' bagaçxtewa peesya' ājāne'kwe, i'kwe'sx yakh nes yuutxna naa pa'ga. Nawa adxa' i'kwe'sx yakh nes yuuya'wameeth.

⁸ Adx uute adx kakwete sxūsxwa'ja's ma'wēçxáawa yūuk adx uumeyna.

⁹ Isath we'we', naa kiwete mtee mteewa Dxus yuwe's pta'sxna pekūhsa', naa u'y txã'wē yūuni'swa ja'da pta'sxni yuuna peçxkanamée jīk.

*Jesusa's preesu'jwa'ja's Judas dukhya' neeyūuni
(Mt 26.14-16; Lk 22.3-6)*

¹⁰ Txajū' txãa yakh u'jusa teeçxsa Judas Iskar-iote' sacerdote npiiçthē'jwe'sx kusete Jesusa's dukhya' puutx we'weya' u'kh.

¹¹ Aça' txãawe'sxa' wala weçxana vxyu dukhya' neeyūutx. Txajū' Judasa' ¿ma'wē

yūuçxa Jesusa's açesawe'sx kusete dukheki'th?
sūhna wala yajkxku.

Jesusa' docesawe'sx yakh nmeh ũ'ni

(Mt 26.17-29; Lk 22.7-23; Jn 13.21-30; 1 Ko 11.23-26)

¹² Pan lewadura ji'phmée ũ'ni fxiesta en
ājāçte', Paskua'jwa'j piisxaatx ikhe' txāa ente'
txāa yakh u'jusawe'sxa' Jesusa's pějxtxi:

—¿Paskuatewe'sxa's ũ'ya' mtee pheu'jya' kaa-
jxa'waga? jīte',

¹³ txāa yakh u'jusawe'sx e'zsatx na'wēk jxkaah:

—Me'jwe Jerusalenna. Sa' kxtee teeçx piçthē'j
uyuune'kwe yu' mitxha's yakhçxa u'jweçte. Sa'
e'stey u'jwene'kwe,

¹⁴ aça' txāa mtee u'kate', i'kwe'sxwa kxtee
u'kaçxa yat namu's pēyine'kwe: ¿Mtee piesa
ūsuki'g Paskuatewe'sxa's pheu'jçxa adx yakh
u'jusawe'sx yakh ũ'wa'ja's? jīnak kwe'sxtxi
jxpe'jsa' yuwe kaah jīne'kwe.

¹⁵ Aça' txā' pta'sxina ēe yatte teeçx piesa
walasa pheu'jniyā'jsa. Kxtee Paskuate ũ'wa'ja's
pheu'june'kwe.

¹⁶ Txā'wē jxkaathe', txāawe'sxa' çxhabna
u'jçxa' Jesus ma'wē jxkaahni's jxuka kxtey
uyçxa', Paskuate ũ'wa'ja's pheu'jtx.

¹⁷ Jxuka çxhi'dxiçte', Jesuswa kxtee pa'kh txāa
yakh u'jusawe'sx yakh.

¹⁸ Sa' mesate ũ'na u'pçxa', najīk:

—Isath we'we', ayte adx yakh ũ'na u'psa
teeçxsa' adxa's açesawe'sx kusete dukhya'wa'
jīte',

¹⁹ jxukaysa nxus we'wena puutx ya'paapēyī'tx:

—Meeçxa' çadx wáa txã'wẽ açesawe'sx kusete dukhwa'jsane'tka? jĩnatx jxukaysa txã'wẽçxaçxáa we'we'.

²⁰ Aça' Jesusa' pta'sxku:

—Adx yakh u'jusa teeçxsa' maa txã'wẽ adx yakh ja'daçxah kuse's plaatukhẽ akhena txãa adxa's açesawe'sx kusete dukhwa'jsa'.

²¹ Dxus Nçxi'k Nasa Yuusa' ma'wẽ uuwa'jsatewa Dxus librute pta'sxi'k txã'sa' kxtey yuuyujuna. Nawa adxa's açesawe'sx kusete dukhsa' seena' yuh nxuste khẽjena. Txãa piçthẽ'ja' wejx yuuwa naa kiwete kasehmeewaçne' wejx ew yu' jĩnak we'we.

²² Nee ũ'na u'píi, Jesusa' pana's jxpa'gaçxa Dxusna weçxana'wa pe'ltedeçxa ũsu'sku na'jĩna:

—Mẽ'we, naa pana' adx kakwe na'wẽsa' jĩçxa',

²³ waso'swa jxpa'gaçxa Dxusna weçxana'wa jxukaysatx tudxkaathe', jxukaysa tudtxi txãa wasotewe'sxa's.

²⁴ Aça' Jesusa' na'wẽk we'we:

—Naa wasotewe'sxa' adx ee na'wẽsa', maazkuẽesatewa ãh uwwa'jsa'. Dxusa' txã'wẽk adx eea's pkawçxa yuuçxáa i'kwe'sxtxi nwe'wewa'ja's nvxiht u'se pheu'jçxa.

²⁵ Isath we'we': ãçxhũyã'ja' peena yu' tudxme'nja naa uwa yu'a's, naasáa Dxus jxkaahwa'j ente yuuçxáa ki' tudxi'nja.

Pedro ãsxiiwa'ja's Jesus pta'sxni

(Mt 26.30-35; Lk 22.31-34; Jn 13.36-38)

²⁶ Txajũ' Dxusna weçxana memçxa', Oliwos vxiçna u'jtx.

27 Kxtee pa'jçxa', Jesusa' na'wëk pta'sx:

—Dxus librute we'weçxa': piisxáa-thegsa's ikhte', piisxá' jxuka ũphuutxna jĩ'k txáa pa'ga naa kuste' i'kwe'sxa' adx tasxu jxuka ũphuune'kwe.

28 Txã'wë yuutewa, adxa' ki' ãtxĩ yuuçxa i'kwe'sx yaçte u'jwe'nja Galilean jĩte',

29 Pedro paşçxa':

—Vxite yu' makwe ũukhçxa ũphtewa, adx yu' txã'wë yũume'nja jĩk.

30 Aça' Jesusa' na'wëk pta'sx:

—Idxa's isath we'we', naa kuste atalx e'z us we'wemeyna, tekx us ãsxĩijaç yuune'ga adxa's jiimeeth jĩna.

31 Txã'jĩtewa, Pedro' jweeíiçxáak çxhãçxha we'we':

—Makwe idx yakh ih uune'jçxawa, idxa's jiimeeth jĩna yu' ãsxĩime'nja jĩte', jxukaysa txã'wëçxaçxáatx we'we.

*Jesusa' Geçemanite Dxus yakh puutx we'weni
(Mt 26.36-46; Lk 22.39-46)*

32 Txajũ' teeçx ahte pa'jtx, Geçemaní yaasesate. Sa' Jesusa' txáa yakh u'jusawe'sxtxi:

—Ayte me'pwe, naapkaçxha' adxa' Dxus yakh puutx we'weya' u'jweçthu jĩçxa',

33 Pedro, Jakobo, Juan txáawe'sxçxáatx pe'jçxa u'kh. Txajũ' Jesusa' wala nxus yajkxçxa',

34 na'jĩnak pta'sx:

—Txakwe wala pxthaa yuuçxa uuwa'ja's ya-jkxte', wala nxus yuja'. Aça' i'kwe'sxa' ayte dehmée me'pwe jĩçxa',

³⁵ jxu'jmeekuẽ u'jçxa kiwega pkipha weteçxa Dxusna pẽjxku txã'wẽ seena' yuuçxa uuwa'ja's yu'pthejkahn na'jĩna:

³⁶ Tata, idx yakha' kĩh yuhwa thẽysa yu' meea'. Aça' txã'wẽ seena' nxuste uuwa'jũ meen nwe'we. Nawa adx jxthãasni's kxtey yuumeẽçxawa, iidx jxthãasniçxá's kxtey meen yũu jĩk.

³⁷ Txajũ' Jesusa' txãa tekhsatx thegya' kũhçxa', dehna ũstek uy. Sa' Pedro's we'wek:

—Dehmée u'pkaathe', ¿teeçx oraçxáawa ãtxĩ u'pmée dehwa'ga?

³⁸ Ewmeete weteya'mée, Dxus yakh puutx we'wena me'pwe dehmée. I'kwe'sxa' ũsuh yu' çxhãçxhai'kwe yaaki', nawa kakwe yu' çxhãçxhaçme' kxtey yuuya'.

³⁹ Txajũ' ki'kin Jesusa' u'jçxa', txã'wẽyçxáak we'wena Dxus yakh puutx we'we'.

⁴⁰ Sa' thegya' ki' sxawedçxa', txã'wẽy deeni ũstek uyna kũh, txãawe'sx yafxa' dee wẽeçxa çxhãçxhaçmeene'ta naa pa'ga. Txã'wẽ Jesus uyna kũhte, ma'wẽ pasya' yuhwa ãjã'çmeeta'.

⁴¹ Txajũ' tekh uswa txãawe'sxtxi thegna kũhçxa', Jesusa' na'jĩk:

—Ãçxh yuuçxá' jxkaaseya' mdejxujíiwe. Nawa ãçxha' pejka en ãjk, Dxus Nçxi'k Nasa Yuusa's ewmeesawe'sx kusete dukhwa'j.

⁴² Txã'wẽyã'ja' aça' kiiteçxa mejkawe. Adxa's açesawe'sx kusete dukhwa'jsa' yujxã'ja' jĩk.

Jesusa's preesu'jni

(Mt 26.47-56; Lk 22.47-53; Jn 18.2-11)

⁴³ Kxtee we'wena nee ũsiyna, Judasa' kũjk. Txãa yu' Jesus yakh u'jusa docesatewe'sxĩçxáak

yu', aça' txãa Judas yakh nasa wala kũhtx kçxilx fxtũ txã'wẽ atçxa. Txãawe'sx yu' Dxus leya's kaapiya'jsawe'sx vxite' sacerdote npiiçthẽ'jwe'sx vxite' judiu nthẽ'jsawe'sx jxkaahnitx yu'.

⁴⁴ Judasa' Jesusna uwewa'jsatx na'wẽku'ga yu'kxwe'weçxa pe'jna yuwé': Ma'sna dxi'pte weçxa'nja txã'sna i'kwe'sxa' tudçxa jxũna u'jwene'kwe jĩnaga yu'kxwe'we.

⁴⁵ Txajũ' Jesus tasxte utxaana kũhçxa':

—Kwe'sxtxi jxpe'jsa jĩçxa weçxak.

⁴⁶ Naapkaçxha' nasa' Jesusa's tudtxi jxũna u'jya'.

⁴⁷ Txã'wẽ Jesusa's tuduçte', Jesus yakh u'jusa teeçxsa' kçxilxa's jxkuutxi'jçxa sacerdote npiiçthẽ'jna selpisáa thũ'wẽ's spẽ'thku.

⁴⁸⁻⁴⁹ Txajũ' Jesusa' nasatxi' na'jĩk:

—Adxa' een isath dxuus yatte kaapiya'jna ũsu' i'kwe'sx ksxavxyte. Nawa txagaçxhíi yu' tudmeeçxa', ãçxh yu' peswéethasi'kwe kçxilx petx fxtũ atçxa pa'j, tudçxa jxũna u'jya'. Nawa Dxus libroute fxi'jni ũsa' txãa kxtey yuukahn txã'wẽ yuuça' jĩnak we'we.

⁵⁰ Txajũ' Jesus yakh u'jusawe'sxa' txã'sçxáana nvxihtçxa jxuka ũphna u'jtx.

Teeçx piçtakx iyuna u'jni

⁵¹ Naapkaçxha' teeçx piçtakx dee pa'çxni yakhçxáak Jesus e'stey u'jweç yu', aça' txã'snawa tuduçtxi yu'.

⁵² Nawa dee pa'çxni's nvxihtçxa, iyuna u'kh sũpxçxáa.

*Judiu nthē'jsawe'sx tasxte Jesusa's kuutxa'jni
(Mt 26.57-68; Lk 22.54-55, 63-71; Jn 18.12-14,
19-24)*

⁵³ Txajū' Jesusa's sacerdote npiiçthē'j tasxte nuypa'jtx. Aça' kxte' sacerdotewe'sx, judiu nthē'jsawe'sx Dxus leya's kaapiya'jsawe'sx jxukay pkhaakhetx.

⁵⁴ Aça' Pedro' Jesus e'ste jxu'kh neeyūuna u'jna ūsu', sacerdote npiiçthē'j yat patxute pa'phkaçx. Sa' patxute neeyūuk policiawe'sx yakh ipx bajçxna.

⁵⁵ Naapkaçxha' sacerdotewe'sx vxite' judiu nthē'jsawe'sx jxukay pkhaakheçxa, Jesus ewmée yūuni's pakwetx, ewmée yūuni's kpajkxçxa kiikhe'jya' sūhçxa. Nawa uymeeta'.

⁵⁶ Txā'wē uymeetewa maaí yu': Jesusa' yu-uwesa yuja' jīna yuwe ūsu'tx. Nawa txāawe'sx pta'sxni' isamée fxiyfxiyçxáak kaseje'.

⁵⁷ Txā'wētewa maaí yu' na'wēttx we'weya' yajkx:

⁵⁸ —Jesus we'weçxa': Naa dxuus yat nasaa txaahni's pētçxça, tekh ente' ki' vxite tx-aja'nja nasa vxitnimeesa jīna we'weni's kwe'sxa' iiwēsē'tha'w jīnatx pāatxhī'khe'.

⁵⁹ Makwe txā'wē we'wetewa, txāawa isamée iičxáak kaseje'.

⁶⁰ Txajū' sacerdote npiiçthē'ja' kiiteçxa', Jesusa's na'wēk we'we:

—Na'wēttx pāatxhī'khe' ¿txā'sa' ma'wēçxáawa pasya'wameegá'? Meeçxa' ¿isa yuh txā'jīwá'nta? jītewa,

⁶¹ Jesusa' teeçx yuweçxáa yuhwa pasme'. Aça' sacerdote npiiçthē'ja' ki'kin pějxku:

—¿Idxa' Kristo, Dxus Nçxi'k dxihgá'? jíte',

⁶² Jesus pasçxa':

—Txã'wēiith. Aça' i'kwe'sxa' uyuune'kwe Dxus Nçxi'k Nasa Yuusa' Dxus pukate kaççxa u'pte. Sa' cieluju tãaphte kĩaçtewa uyuune'kwe jĩk.

⁶³ Txajũ' sacerdote npiiçthē'ja' peekx athni ropa's ũusçxa sudeçxa na'wēk we'we:

—¿Kĩjxa'çxáa testigo jwee pejiikxtha'w?

⁶⁴ I'kwe'sx wēsē'jna ũste na'wēk Dxusa's açewe'we. Aça' i'kwe'sxa' ¿maa sũjũ'kwe? jíte', jxukaysa pasçxa':

—Txã'sa' ikhteçxáa ewna jĩtx.

⁶⁵ Txajũ' vxite yu' dxi'pte fxne'sx avxythethna dxi'pa's aphçxatx uka'kana na'jĩ':

—Mjiyu wakx ¿kimga idxa's uka'ka'? jĩnatx npeevxysxika'. Aça' policiawe'sxwa txã'wēytxi dxi'pte uka'ka'.

Jesusa's jiimeeth jĩna Pedro we'weni

(Mt 26.69-75; Lk 22.56-62; Jn 18.15-18, 25-29)

⁶⁶ Pedro' patxute ũste', teeçx u'y sacerdote npiiçthē'ja's selpisáa kũhçxa',

⁶⁷ Pedro's uyku txã'wē ipx bajçxna u'pte. Sa' dxi'pte ew thegçxa, na'jĩnak we'we:

—Idxwa Nasarethuwe'sx Jesus yakh u'jusag jíte',

⁶⁸ Pedro' ĩsxĩik:

—Adxa' txã'sa' jiimeeth kimnane'kwe we'we na'swa jĩçxa', kasehna u'jçxa ekajuk ũsu'. Naap-kaçxha' atalx we'wek.

⁶⁹ Aça' txãa u'ya' Pedro's ki' uyçxa' kxtee ũssatxi' na'jĩnak pta'sx:

—Naa piçthê'ja' pejka Jesus yakh yuh u'jusa' jînak we'we.

⁷⁰ Nawa Pedro yu' ki'kin îsxîik. Aça' txâa e'su' kxtee ùssawa Pedro's na'jînatx we'we:

—Isa, idxa' txâa yakh yuh u'jusag. Galilea-juwe'sxçxa íig txājũ nasa na'wê we'we' jîte',

⁷¹ Pedro' ùusçxa we'wena jurāyku:

—Isa Dxus uyte, i'kwe'sx kxsusu'i'kwe txâa piçthê'ja's jiimeeth jîçpkaçxha',

⁷² atalxa' e'z us we'wek. Txajũ' Pedro' Jesus we'weni's yajkxku: Atalx e'z us we'wemeyna, idxa' tekx us îsxîijaç yã'j yuune'ga adxa's jiimeeth jîni's. Aça' Jesus we'weni kxtey yuute', Pedro' wala ù'nek.

15

Jesusa's Pilato kusete dukhni

(Mt 27.1-2, 11-14; Lk 23.1-5; Jn 18.28-38)

¹ Txajũ' khikhyna sējēçte', sacerdotewe'sx judiu nthê'jsawe'sx, Dxus leya's kaapiya'jsawe'sx yã'jçxa walasa pwe'sx pkhaakheçxa Jesusa's tudçxa jxũna u'jttx Pilato tasxte kuutxa'jya'.

² Aça' Pilato' Jesusa's na'jînak pējx:

—¿Idx wáa judiuwe'sxtxi jxkaahsane'ga? jîte', Jesusa' pasku:

—Txã'wê íith. Isa yuh we'weg jîk.

³ Txajũ' sacerdotewe'sxa' Jesusa' kîhtewa jxuka ewmeesa' jînatx yuwe ùsu'.

⁴ Aça' Pilato' ki' we'wek Jesusa's:

—Mwēesē'j, idxa's na'wētx kīhtewa jxuka ewmeesa' jīna yuwe ūsu', aça' çma'wēçxáawa pasya'wameegá'? jīte',

⁵ Jesusa' teeçx yuweçxáa yuhwa we'weme', aça' Pilato' kujk yajkxna neeyūu.

Jesusa's ikhwa'j vxitni

(Mt 27.15-31; Lk 23.13-25; Jn 18.38-19.16)

⁶ Pilato' Paskua fxiesta iisa teeçx preesu txhweete'k nasaa pēyni's.

⁷ Txāa ensu' kxte preesu ūsu'k Barabás yaasesa. Txāa piçthē'ja' vxite nasa yakh pkhaakheçxa gobierno yakh puí kiisçxa nasatx wala kiikhe'jsa npiičthē'kh yu'. Txāa pa'gak preesu ūsu'.

⁸ Txajū' kxtee nasa pa'jsa', Pilato's pējxtxi fxiesta iisa ma'wēne' yū' txā'sa' açxwa txā'wēy yūukahn.

⁹ Aça' Pilato' pējxku:

—I'kwe'sxa' çjudiuwe'sxtxi jxkaahsa'skwe txhweete jxthāasu'á'? jīk.

¹⁰ Nawa Pilato yu' sacerdote ne'jwe'sxa' Jesusa's ahççxa dukhtewa jiiççak txā'wē we'we.

¹¹ Nawa sacerdotewe'sxa' nasa jxukaysatx yu'kxwe'wetx, wejxwa Barabasna mitxhwete jīkahn.

¹² Aça' Pilato' pējxku:

—I'kwe'sx we'weçxa', Judiuwe'sxtxi Jxkaahsa jī'i'kwe çtxā'sa' kījkwe yūu jxthāasu'? jīte',

¹³ txāawe'sx sus we'wena pasçxa':

—Txā'sa' kluuskhē mkaafxuçu'j jītx.

¹⁴ Txajū' Pilato' pējxku:

—Txã'wě yũukahna' naa piçthě'ja' çkĩhga ewmée yũ? jítewa, txãawe'sx yu':

—Kluuskhě mkaafxuçu'j jĩnaçxáatx sus we'we'.

¹⁵ Aça' Pilato' nasa yakh ew neeyũu wěeçxa, Barabasa's txhweetekaakh, sa' Jesus yu'sa' kaapeçxukwe'jçxa kluuskhě fxuçkahn dukhku.

¹⁶ Txajũ' soldauwe'sxa' Jesusa's jxũna u'jtx txãawe'sx ũsni patxute. Sa' soldauwe'sx jxukaysatx kxteeçxaçxáatx pa'ya.

¹⁷ Khĩçxatx Jesusa's jxkaahsa ropa na'wěsa kaapã'çxi'jçxa, dxikthete yu' çhũçh korona vx-itçxa kaafxĩkhe'j.

¹⁸ Txajũ' na'wě sus weyna:

—Judiuwe'sxtxi jxkaahsath jĩ'ne'ga jĩnatx weeçx we'we.

¹⁹ Sa' dxikthega fxtũu zuzsaju pekwe'kwena, fxne'sx avxythethnatx txajx tasxte peejxũkwe'.

²⁰ Txã'wě yũuna jxã'jçxa', jxkaahsa ropa na'wěsa's ksũupi'jçxa, txajx ropa's ki' kaathe'jtx. Txã'wě yũuçxatx kluuskhě fxuçya' jxũna u'j.

Jesusa's kluuste fxuçni

(Mt 27.32-44; Lk 23.26-43; Jn 19.17-27)

²¹ Aça' çxhabu kasehna u'jweçte', teeçx piçthě'j Simon yaasesa's puutx uyçxa soldauwe'sxa' txã'snatx Jesus yakhni kluusa's kx-aakhe'jçxa pe'jna u'j. Txãa Simon yu' Alejandro Ruxowe'sx neyku yu', Cirene kiwetewe'sx.

²² Txajũ' Jesusa's teeçx ahte Golgota yaas-esatetx pe'jna u'j. Txãa Golgota yu' Uusáa Dxikthé Dxi'thçxáasa jĩni'.

23 Kxtee pa'jçxa', vxinote yaasa ka'daçxatx yus wëe, nawa Jesusa' tudxme'.

24 Txajũ' kluuskhë fxuççxa', soldauwe'sxa' Jesus ropatxi's txudeedeçxa swerte kaahtx txajx kaaçni atxha's maa soldau knaytewa jiyuya'.

25 Kusii las nwewetetx Jesusa's kluuskhë fxuç.

26 Sa' kîh yûusate txã'wë kluuskhë fxuççxawa pta'sxna fxi'jçxa ki'ptxi kluus vxiçte: Judi-uwe'sxtxi Jxkaahsa' jîna.

27 E'z nasa seena' yuuwesa yu'tx txãawe'sx yakhtxi Jesusa's pdxi'p kluuskhë fxuç.

28 Aça' Dxus librute fxi'jni' kxtey yuuk: Nasa ewmeesathas yuuwesa yakhku ki'pni yuu jîna fxi'jni'.

29 Txajũ' kluus tasxuy uykhëwsa' dxikthetx kaawũhnatx weeçx we'we':

—Dxuus yata's idxa' pëtxçxa tekh ente' ki' kiisu'nja çjï'çmeegá'?

30 Txã'wë ãjãwa'jsaçxa' çmjïitega kluusuh peekii iyuçxa sa'ja'çmée? jï'tx.

31 Aça' Dxus leya's kaapiya'jsawe'sx, vxite' sacerdotewe'sxwa na'jînatx weeçx we'we':

—Vxite yuutxi' nwe'weçxawa, peekii yu' ya'nwe'weya' ãjã'çme'.

32 Israelwe'sxtxi jxkaahsa Kristoth jï'k na' txã'wë dxihçxa', ãçxhii kwe'sx uyna ùste kluusuh sa'jana aç yuuçxáa txã'wë dxih yu'ga sũjũ'nja'w jï'tx. Txã'wëy txãa yakh kluuskhë fxuçni u'psawe'sxwa Jesusa's wëesxu'tx.

Jesus uunii

(Mt 27.45-56; Lk 23.44-49; Jn 19.28-30)

33 Txajũ' ěepxãh wala ãanite', naa kiwete jxuka çxhi'dxku kusuçte las trestepkaçx.

34 Txã'wě çxhi'dxni las tres äjãçpkaçxha', Jesusa' na'jĩnak sus we'we:

—Eloi, Eloi çlama sabaktani? jĩk. Txã': Adx Dxusgu sa' çmjĩ pa'gaga adxçxáana nvxiht? jĩni'.

35 Aça' nasa kxtee wēsē'jna ũssa' Eliasa's pa'yaça' jĩtx.

36 Naapkaçxha' teeçxa' wuwuuna u'jçxa, vxino pussate esponja's akhçxa fxtũute açhçxa Jesus yuwete utxak çxazxakahn. Sa' na'jĩk:

—Sxuuna' thegna meswe, aan Eliasa' kluusuh spajkxya' pa'jana jĩk.

37 Txajũ' Jesusa' ki'kin sus we'wenitee uuna kãjk.

38 Naapkaçxha' dxuus yatte txudenisa liensu pesath a'kxnisa' peekxçxáa sutek puupxãjkhě kute ěju kiwete kĩh.

39 Aça' kluus dxi'pte ũssa soldau kpiitana' Jesus txã'wě sus we'weçxa uuçte uyçxa', na'wěk we'we:

—Naa piçthě'ja' isa Dxus Nçxi'k yuh yu'ga jĩk.

40 Txã'wěy u'ywe'sxwa jxu'ju thegna ũsu'tx. Aça' txãawe'sx ksxavxyte', Salomé, vxite' Maria Magdalena vxite' Maria Jakobo Josewe'sx njĩ'j txãawe'sxtxi yu'. (Txãa Jakobo's nuuçxa' jĩ'tx).

41 Naa tekx u'ysa' Jesusa's selpiina u'jusatx yu' Galilea kiwesu. Nawa txãawe'sxçxáamée, vxite u'ywe'sxwa Jesus yakh ih Jerusالente pa'jsatx ũsu'.

Jesusa's pedani

(Mt 27.57-61; Lk 23.50-56; Jn 19.38-42)

⁴² Jxkaasewa'j en ãjãçte', kîhnawa jxuka pheu'jçxatx nvxiitu'.

⁴³ Txãa pa'gak kusuçte' José Ari-mateajüwe'sxa' Pilato tasxte ùukhmée utxáa Jesus kakwe's pějxya'. Txãa José yu' judiu ne'jwe'sxsa íçxáak yu', sa' Dxus jxkaahwa'j ena' dud ãhwaça' sũhna yaakxsak yu'.

⁴⁴ Txã'wē Jesusa' uuyã'kh jĩni's jiyuçxa', Pilato' wala kuh yajkxçxa soldau kpiitana's pa'yak pějxya' txã'wē Jesus uudxihtewa jiyuya'.

⁴⁵ Txajũ' kpiitana': Jesusa' uuyã'kh jĩna pta'sxte', Pilato' Jesus kakwe's jxũna u'khaakh.

⁴⁶ Aça' Josea' Jesus kakwe's spajkxçxa, liensu fxinusa weyçxa kxteek yap. Sa' jxũna u'jçxa kwet kafx u'se phadenisa ji'phuk txkaa khikhçxa, u'kani kafxte yu' kwet walasajuk aph.

⁴⁷ Txã'wē yũuçte', Maria Magdalena vxite Maria José nĩ'j txãawe'sxa' Jesus kakwe's mkaa khikheçtewa uytxi.

16

Jesus ki' itxi yuuni

(Mt 28.1-10; Lk 24.1-12; Jn 20.1-10)

¹ Txajũ' jxkaase en skhēwniite', Maria Magdalena vxite' Maria Jakobo nĩ'j, vxite' Salomé txãawe'sxa' wēt putasá weytxi Jesus kakwete sxũsxya' u'jya'.

² Txajũ' kuskuskhē wala kusí u'jtx, sa' sek kãjaçte' pedaní kafxte pa'jtx.

³ Sa' kxtee pa'jaççxa', na'jĩnatx txãawe'sx pwe'sx we'we':

—¿Kim pedaní kafxte apnisa kwet wala's kiisukx? jĩ'tx.

⁴ Txajũ' pedaní kafxte thegçxa', apnisa kwet wala' kiisçxa pukate ki'pni u'ptetx uy.

⁵ Aça' pedaní kafxte u'kaçxa', teeçx piçtakx ropa çxihmesa jxu'jsa athçxa paçu ju'gu kaçxçxa u'pte uyçxa', wala ũukhtxi.

⁶ Nawa txãa piçtakxa' na'wëk pta'sx:

—Ũukhnuwe. I'kwe'sxa' Jesus Nasarethuwe'sxa's kluuskhẽ fxuçni uuk txã'snai'kwe pakwé'. Nawa txã' itxĩ yuuyã'kh, txãasa ayga meeyã'ja'. Aça' khikhniga mthegwe wakx, kĩhwa meea' jĩçxa' kaakh na'jĩna:

⁷ Txãa yakh u'jusawe'sx vxite' Pedro txãawe'sxtxi na'jĩne'kwe: Jesusa' i'kwe'sx yaçte u'jweça' Galilean, aça' kxtee txã'sa' uyuune'kwe ma'wëga uumeywa pta'sx txã'sa' kxtey yuuna jĩkaathe',

⁸ txãawe'sxa' pedaní kafxu wala ũukhna ũphna u'jçxa, kuh yaakxnite vxitesa yuutxi' dxi'the kim yuhtxwa pta'sxmeetx u'j.

*Maria Magdalena's Jesus vxyaani
(Jn 20.11-18)*

⁹ Txã'wë jxkaase en skhẽwnijũ' Jesusa' ki' itxĩ yuuçxa', Maria Magdalena khuẽ'yna vxyaak, na'wë siete eçx luuku vxit-satx kutxi'kh txã'sna.

¹⁰ Aça' txãa u'ya' Jesus yakh u'jusawe'sx tasxna u'jçxa, pta'sxku. Txãawe'sxa' nxusçxa ũ'nenatx u'p yu'.

¹¹ Sa' Jesusa' itxĩ yuuga aça' ũ'kwe' uythu jĩna pta'sxtewa, weh yuhwa txã'wë yũune' sũjũ'çmeeta' txãawe'sxa'.

Jesus fxiy yuuçxa vxyaani
(Lk 24.13-35)

¹² Txãa entey Jesusa' ki' vxyaak fxiy yuuçxa, txãa yakh u'jusawe'sx e'zsa dxi'the u'jweçte.

¹³ Aça' txãawe'sxwa ki' sxawedçxa, Jesusa's txã'wẽ uytha'w jïna vxitetx pta'sxtewa, txã'wẽ uyne'ta sũjũ'çmeeta'.

Jesusa' txãa yakh u'jusawe'sxtxi neewe'weçxa
nvxiitni

(Mt 28.16-20; Lk 24.36-49; Jn 20.19-23)

¹⁴ Txã'wẽ pta'sxna jxã'jaçpkaçxha', txãa yakh u'jusa oncesa mesate kaçxçxa u'pte ki' vxyaaxça', na'jïk:

—¿Kïh yuuçxakwe adxa'sa' ki' ïtxï yuune' sũjũ'çmee? Adx pta'sxni's ùuste yu'akhya' ãjã'çmeei'kwe, sa' ïtxï yuute uysáa pta'sxtewa txã'wẽ uyne'ta sũjũ'çmeei'kwe.

¹⁵ Txajũ' na'jïnak jxkaah:

—Me'jwe, Dxus yuwe's pta'sxya' nasa jxukaysatx maa kiwete mteewa jxuka.

¹⁶ Aça' maawa adxa's ùusuh jxuka yajxna jxpa'gaçxa yu'te ya'bautisaïna txã' nwe'weni yuuna. Nawa adxa's ùusuh jxuka yajxna jxpa'gasame' Dxus kastigo's knayuuna.

¹⁷ Adxa's ùusuh jxuka yajxna jxpa'gasa' na'wẽ yũuya' ãjãtxna: Adx pu'çxte', eçx luuku vxit-satxwa nasaa ùusuh kutxi'jixna. Sa' yuwe fxiysajuwa we'wetxna.

¹⁸ Ul wesweetxwa kuseju uweetxna. Sa' makwe weneno's tudxtewa, kïh yuhwa kãaçã'jmeena kakwete. Sa' ãçã'sa kakwete

peekiizeçxa, Dxus yakh puutx we'wete',
katxhixna jĩk.

Jesus cielun u'jni

(Lk 24.50-53)

¹⁹ Txã'wẽ yu'kxpehni e'su', kwe'sxtxi jxpe'jsa
Jesusa' cielun pe'jna u'jni yuuçxa, Dxus pukate
kaçxku paçu ju'gte.

²⁰ Aça' txãa yakh u'jusawe'sxa' u'jçxa', Dxus
yuwe's mtee mteewa pta'sxtxi. Txã'wẽ kwe'sxtxi
jxpe'jsa pu'çxte', kĩjkĩh yũuya'wa ya'ãjãk, txãa
pa'gatx txajx we'weni' isasa yuhna sũhwa'ja's
ji'phu'.

lxxxv

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd